

حکمت کتابخانه دبی

عمر : ۴

شهبندر زاده فلبلی

احمد علمی

تاریخ اسلامک برنجی ذیلی :

آللهی نظر حکمرمی در؟

یاخود

حضور فنده مسالک کفر

[فلسفہ مافوق الطبیعہ مبامی]

قسط: طبیعہ



حکمت

مطبوعہ اسلامیه سی

۱۳۲۷

بش فورمالق برنجی جزو: فیثانی اوج غروشدر

1844

1845

1846

1847

1848

1849

1850

1851

1852

حکمت کتابخانه

عمر : ۴

شهبندر زاده فلبلی

امیر علمی



تاریخ اسلامک برنجی ذیلی :

آللهای نظامی و بحری

یاخود

حضور فنده مسائل کفر

[فلسفه و افق الطبیعه مباهتی]

قسطه طینه



حکمت

مطبعة اسلامیه

۱۳۲۷





قارئین ایلہ بر حسب حال

مبارک و طنمزدہ مشروطیت اعلان اولوندی ، استبداد یرینه ،
اساس اعتباریلہ حریت اقامہ ایدیلدی . بوندن صوکر اهر فرد «حریت
وجدان ، حریت کلام» حقنه مالک اولاجقدر واولمالی در . حریت ،
انسانلغک شریطه اساسیه سی در ، حر اولمایان بر آدم ، شرائط انسانیتی
آ کلامامش و نفسنده انسانلق عزتتی تذلیل ایتمش سفیل بر آدمدر ،
نفسنده شرف ولزوم حریتی حس و تقدیر ایتدیکی حالده دیگرلرینک
حریتنه ممانعت ایتک ایسته یین بر آدم ایسه ، فیکر مجه ، انسان شکننده
بر جنواردر . حریت ، مبارک و مقدس بر شیدر ، هیات که بو قدسیتی
« استقلال بهیمی» ایلہ قاریشدر مامق اوزونجه تبعاته ، مهم بر تنوره
محتاجدر . حریتک حسن استعمالی نه درجه باعث فیض و ترقی ایسه ،
استقلال بهیمی ایلہ قاریشدر یلارق سوء استعمالی ده اودر جه لرده بادی
نکبت و سفالت اولور . واقعا بو سوء استعمالک اوکنی آلمق وظیفه سی
علی الاصول قوانینه مودوعدر . لکن قوانین موجوده مدینه مک بو
وظیفه یی ایفا ایده جلک یر حال مکملیته کلدیکنی کیم ادعا ایده بیلیر ؟
ذاتاً قوانینک دائماً سطوحده اجرای فعل ایتدیکی و هیچ بر وقت
اعماق اجتماعباتده مهم تأثیرلر کوسترمدیکی فلسفه تاریخییه واقف
اولانلرجه مسلمدر .

دیمک که دنیاده هر فکر کبی ، حریت ده ، استعمالته کوره ، خیر و شری محتوی و موجب اولاییلیرسهده بو فکر جلیلده اساس واصل اولان خیر اولدینی ایچون حریته تجاوز ، انسانیته قارشی ایقاع ایدلمش بر جنایت شکننده تلقی ایدیللملی در . حریت وجدانه ، حریت افکار و کلامه تجاوز بر جنایت اولمقلدهده قالماس . محققات تاریخیه دندرکه بو تجاوزات ، افکاری اولدیره جک یرده ، بلکهده قوه نامیه سی یاشامغه مساعد اولمایان افکاره بیله بر حیات مستعار ویریر . اوت ، تاریخه بر نظر امعان و تدقیق آتسهق ، کوریرزکه حریتی استبداد ، علمی دینسرلکی تعصب جاهلانه تمیه و بلکه ایجاب و تولید ایتشدیر .

مادام که مملکتتمزده حریت وجدان و کلام موجوددر ، بوکون اولمازسه یارین ، یارین اولمازسه او برکون هر فرد بو حق استعماله قالدشاجقدر . بیلن ده ، بیلیمه ین ده یازاجق ، سویلیه جکدر . هیئت اجتماعیه من ایچون خیرلی و مفید فکترلره برابر بالطبع مفرط و مضر فکترلرده میدان ملیته آتیلاجق و حتی ناشرلری طرفدن بویله افکارک انتباء و صلاح ملیمنز ایچون الزم اولدینی ادعا اولوناجقدر .

بویله افکاره ینه افکارله مقابله ایتک ، میدان علم و اجتهاده جبر و قهری صوقمامق لازمدر . ذاتاً افکاره صوپا ایله ، اجتهاداته قهر و تنکیل ایله مقابله دن هیچ بر نتیجه چیقمایه جنی ، ینه تکرار ایده رزکه : بالتاریخ محققدر .

بو قدر جدی مسائلهده ، عزت نفس ملی بی کوزتمک بهانه سیله منافع اساسیه ملیه بی آیق آتسه آلمق اصلاً جائز اولمایه جغندن حقیقتی اظهار ایله دیرزکه : قرون وسطی حیاتندن عصر حاضر حیاتنه کچمک اضطرارنده قلمش بر ملتر . پک کوچوک بر اقلیت اعتباریله

بو حکم دو غری اولماسه بیله عمومیت اعتبار یله یک دو غری در. شوراسی ده وار که یوقاریده بحث ایتدی کمز. « کچید، کچمه » آغیر بر تکامل ایله، اوزون بر تدریج ایله یاپیلاماز. زیرا مدنیت، بزم خاطریمز ایچون ویزی بکله مک اوزره ترقی دن واز کچوب توقف ایتمه جکسندن، اویله قیلویغه رفتار یله بز هیچ بر وقت قافله مدنیته یتیشه میز.

اگر سریع و مفید بر تکامل ایله بو مقصدی حاصل ایده مزر سه ک بزم ایله اوروپا اقوامی آره سنده کی مسافه دائماً شیمدی کی نسبتنده قالا جقدر. بوا یسه بر فلاکت ملیه در، زیرا نیم مدنی بر اجتماعیت، مدنی و متکامل لارک سیول احتراصات و استیلا لرینه اوزون مدت مقاومت ایده مزر. احتمال که بعض متفکر لر، اوروپا لیلره سرعتله یتیشمه مزی موجب اولاجق بر شکل تکاملی، خیالی و غیر ممکن عد ایدر لر. بنجه بو دعوی تماماً باطلدر. بو فکر می اثبات ایچون اردو مزی مثال اولارق کویستره بیلیرم. واقعا اردو مزی، المان و یا خود فرانسه اردوسی درجه سنده مکمل دکلدر، لکن بو تفاوتده اک بویوک سبب، عوامل تکاملک عدم تأثیری دکل، پاره سزلک و هنوز زمانک یک قیصه لغی در. بونکله برابر المان اردوسیله بزم اردو مزی آره سنده کی فرق تکاملک یک کوچوک اولدیغنی هیچ کیمسه انکار ایتیمور و ایده میور. بو فرق ایسه استعداد فطری ملی تلاقی ایتدی کسندن بو کون اردو مزیله بحق افتخار ایده بیلیروز. لکن نظر مزی اردو دن امور ملکیه یه، صنایعه، زراعت، و هله معارفه تحویل ایدر سه ک بونلرله اوروپاده کیلر آرا سنده کی فرق عظیمک، مسافه بعیده نک بزی تدهیش ایده جک درجه ده اولدیغنی کور مزی یز؟

عجبا بر نقطه ده اوروپا لیلره بو درجه یا قلاشدیغمز حالده دیگر نقطه لرده بو درجه اوزاق قالدیغمزک اسبابی نه در؟ اگر بواسبابی غرض و عوضدن

حالی و صرف بر مسئله فیه کبی تدقیق ایدرسهك ، اونلرك ماهیتی كشف ایتش اولورزكه بوده امراض اجتماعیه مزى تشخیص دیمك اولور .

بزشو مقدمه ده بواسبابك هپسنى تدقیق ایتسكه ، بواسراضی تشخیصه قالمیشامیز ، یالكر بواثرك اسباب تألیفه عائد اولانلرینى انظار ملتہ قویقم املنده یز . بروقت « تصویر افکار » جریده سنده برسلسله مقالات یازمش وبونلرده « اروپا مدنیتی انتخاب واقباس صورتیلہ آلمانز لزومنی وتقلید عامیانه ایله آلاجمز مدنیتك بزى اصلاح واحیایتمہ چکی شویله دورسون ، آزچوق دست مایته باقى قالان انقاض معالی نی ده محو ایدہ رك بزى حفره اضمحلالہ کوتوره چکنى » مفصلاً محاکمہ ایتش ایدم . بومقالتك همان بوتون متفکر لرمزجه جای قبول وتقدیر بولدیغنى کوردم . بوکون بوتون شومسرو داتك اساسی عین افکاردر . وصانیرم که « حکمت » جریده سیله ایکی سنه مدتلہ تشریته چالیشدیقم افکارده عین منبع ومقصددن صادر اولدیغنى محترم قارئلم تسلیم ایدرلر . بنم اجتهادمه کوره بوملتی کلشن ترقی وتعالی یه وقت لازمنده وصولدن منع ایدہ چك اسباب ایکی قسم مهمه آریلابیلیر :

- ۱ — توقفیر ستمك ، ترقی به عداوت ، تکامل فیکرینه قارشى جاهلانہ برتعصب ، احتیاجات مبرمه زمانه بی تقدیر ایتمه مك که بونلرك جمله سى « شریطه حیات وبقا » مزى آ کلاماق جمله سیله زبده ایدیلہ بیلیر .
- ۲ — معلومات سطحیه ایله قناعت ، صبیغ بر تقلید ، بر هیئت اجتماعیه بی ، قوقله کیدیریزکی ، ارثی وفطری احوال تدن همان تجرید ایدہ رك یکی بر طاقم احوال ایله متخلق ایتمکی ممکن صانمق ، عالم مدنیتك آلایش ابلهفرینندن جدیاتنى تفریق ایتمه مك که بونلرك جمله سى « خستہ بی ساخته طبابتله تداوی ایدیم دیرکن اولدیرمك » جمله سیله زبده ایدیلہ بیایر .

بنابرین بوملتك نعره جهاد وجدالی : نه تعصب جاهلانه ، نه تقلید عامیانه ! « فریادی اولمالی در . زیرا : برملت ایچون عداوت ترقی نه قدر مهلك و قاتل ایسه ، ساخته ترقی ده اودرجه ده مهلك و قاتلدر . بزاوله صانیورزکه ، کونش کی ظاهر اولماسنه رغماً ، حالا بو حقیقی تسلیم ایتمیورز . بوکون ، کوریتشده هر شیدمنز وار : مکتبلمنز ، قانونلرمز ، دأرهلرمز ، مأمورلرمز ، معلملرمز ، کتابلرمز والحاصل هر شی ! لکن نه وارلق ؟ !

بونقطه لری هیمز دوشونمهل و چاره لری نی هیمز آرامالی یز . یاشامغه عزم ایدن برملتك هر فردی ، اومقصد مقدسك حصوانده نفسی علاقه دار کورمه لی دکلی در ؟ بالخاصه ملتك خدمت رهبریسنده بولونان صنوفك « نه مه لازم ! » فلسفه سنه قایلیماسی ، اومقصدك عدم حصوله دلالت ایدن اك مشئوم علامدن صاییلر .

بزنه غریب آدملرز ! انحطاطات اخلاقیه مزی ، اغتشاشات معنویه مزی کوره بیلیمك سعادتنه نائل اولدیغمز وقت ، کندمزی او ورطه هالکه دن قورتارمق ایچون عزم جوانمردانه و غیرت عالیجنابانه یه توسل یرینه مسکینلر کی بویمزی بوکهرك ایشی « مهدی » نك ظهورینه تعلیق ایده رز ! غالباً اوفاجق بر تعمیمله شومهدی فکری نی معنویاتدن اجتماعیاتده نقل ایده رك بر « سیاسی مهدی » ، بر « اقتصادی مهدی » ، بر « اجتماعی مهدی » بکلیورز . اکثریمزك وظائف وطنیه و ملیه یی حقیقه کندینه مال ایتدیکنه باقیلینجه باشقا دورلو حکم ایتنهك امکائی قالمیور . اوت ، بکلیورز که بر سیاسی مهدی کله رك ، بر اوفوروکله ، سیاست خارجه و داخلیه مزی تنظیم ، مأمورینی ملکه ره غبطه ایتدیره جك خصصته و افلاطونلره طاش چیقاراجق مقدرته افراغ ایتسین ! بر

اقتصادي مهدی کسین ده بزه خزینه مجهولدن ملارلر بولیویرسین !
 بر اجتماعی مهدی چیقسین ده بزی شو حالزردن چیقارارق بر شکل
 مکمله صوقسون ! والحاصل اوپله ایسته یورز که بزه هیچ برئمک
 وزحمت چکیمکسزین هرشی کندی کندینه یاپیلسین ، اولسون
 بیتسین ! بوقفاده کیدرسهك ، افسوس بزه !

ینه دائرة قال ومطالعاتی توسیع ایتدك . نه چاره که احوال وافکار
 یکدیگرینه مرتبط . مع مافیه ایجاب ایدن قدرینی سویله دك ، شیمدی ده
 شو اثری تألیفده کی مقصد مخصوصه رجوع ایده لم .

سنه لردن بری اداره مطلقه آلتنده یاشایان ، نزیلن ، حریت
 افکار و افعالندن مهجور براقیلان بر ملتك اورطه ورهبر عوام صنفی
 تشکیله موعود اولان قسمی ، اوتضیقك آلتندن قورتولنجه ، ایلک
 اطواریله ، خیر وشری تمامیه فرق ایدمه یین و افعال وافکارنده سربست
 براقیلان چوجققره بکزر ! بوراسی غایت طبیعی در ، بو ، هر وقت
 بویه اولاجقدر . دیمک شو ابتدا دوره لرنده دهرین متفکرلردن ،
 جدی متبعلردن ، حقیقی عالم و متفکرلردن زیاده ساخته فاضلار ، یازم
 عالم ، لاقید و سطحی متفکرلر یتشه جك . بر حالده که منتظم سوز
 سویلیه بیلنلر ، کندینی هر مبحثده خطابه مقدر خطیب ، برازی
 یازانلر محرر وادیب ، اوچ بش کتاب اوقویانلر علامه اقتصادی ظن
 ایده جك وایتدیرمکه قالدیشاجق [*] شو حالته امل اشتهار ودرد
 معیشتی ده علاوه ایدرسهك وهله شو دیدیکمز صورتله یاشامه نك

[*] وشوراسی ده محقق که بوساخته کارلق دوره فنیسی کچنجه یه قدر
 بویازم عالم ، کندیلرینی لایخطی عد ایده جکار و معارضلرینی تجهیل کی غرابتلر
 کوستره جکار .

امکانی ده حاصل اولورسه ، شویارم عالم صنفک نه قدر چوق افرادی پیدا اولاجنی تظاهر ایدر . بونلرک هپسی چالا قلم یازاجق . اکر بویازیلانلر رومان وشعر کبی مباحثه منحصر قالسه ، ویره جکلی مضرت پک محدود اولابیایر . بوسوزلردن ادبیاتک اهمیت عظماسنی انکار ایتدیکم فکری حاصل اولماسین . حایر . آئی برفن ، آئی برلساندن عبارت اولیشنه کوره ادبیاتی وهله ادبیات قیه وحکمییه سی اولمایان برملتک ترقیسی مستحیلدر . شونی دیمک ایسته رم که فنا بر شعری اوقویان بر آدم ، براز وقت غائب ایتش اولمقدن باشقا بر ضرر کورمییه ییلیر ، لکن یا کلس ومضر بر دستور حکمی واخلاقی نی اوقویوب ده حقیقت دییه قبول ایدن بر آدم ، اولابیلیر که سعادت سی ، وبلکه ذوق معیشتی وحقی حیاتی زهرلر .

مدنیقی تقلیدی بر صورتده آلمق انواعنک الک مهلاک شکلی شو تعریفنه چالیشدیغمز شکلدر . زیرا بوشکلک مهالکنه دوغریدن دوغرییه معروض اولان شبان وطن در . همده یالکز تحصیل اعدادی وعالی کورن وکورمک ایسته ینلری دکل ، سرایت وتعمیم صورتیله یوتون شبان وطندر . شو بیاناتمز مخیل بر تهلهکه تصورندن عبارت دکادر . بومعروضانده کی صمیمیتی وحقیقتی تسلیم ایتیه جک بر دانه منصف وجدان بولونامایه جنی ایچون تصویرینه چالیشدیغم تهلهکه نک یویوکلکنی ایضاح صدندنه دها زیاده اصراره لزوم کورم .

بوتهلهکه یه قارش ی بروظیفه ایله مکلف صنوف اجتماعیه مزبوق می در ؟ واقعا بوخصوصده حکومتهده ، قهر ومنع دکل ، تدریساتی اصلاح وهله تدریسات عالییه نی بونامه لایق بر مرتبه یه ارقا وابلاغ کبی مهم بروظیفه اصابت ایدرسده بوراسی ، علاقه دار اولان صنوف اجتماعیه نک

وظائف جلیله سنی تهوین واسقاط ایتمز . اجتماعیات ملیه مزی سلامت یولنده یوروتمک وظیفه سیاه مکلف ایکی صنف اجتماعی وار :

۱ — معلملر ، متفکرلر ، متفکشلر ،

۲ — خادمین دین [علما ومشایخ]

تربیه ملیه ایله مکلف اولدیفی ایچون اک عزیز واک قیمتدار صنوف اجتماعیه من اولمق لازم کلن بویکی صنف ، کندیلرینه دوشن وظیفه یی حقیقه یاپیورلرمی ؟ بوسؤاله بلا تردد « حایر » جوابی ویره جکمز . بالخاصه علمانک اکثریتله احتیاج حاضری تماماً تقدیر ایتمدیکنی ادعا ایده جکمز . احتمالکه ابتدای انقلابدن بری هنوز اوزون بر زمان کچمدیکی معرض معذرتده خاطره کلیر . بوحالده بیله شخصی تشبیرلرک ، فداکارانه وغیورانه دالئلرک فقدانندن شکایت ایتمکده کندمزی حقلی یولیورز .

برامله موفق اولمق ایچون ، اولان زمین واسبابی تهیه ایجاب ایدر . یوله کیردکن صکره یوروتمک قولایدیر . مملکتتمز تجددده محتاجدر . تجدد ، ییپرامش اولان حیات اجتماعیه مزم یکی بر قدرت بخش ایده . جکدر . لکن فکر تجددی سطحیات وتفرعاته تطبیق ایتمکله ، بویاجیلقله قناعت ایدرسهک ، کندی کندمزی آلداتمقدن باشقه برشی یامش اولماز . اساسات تجدد ایتمدکچه تفرعات تجدد ایده من ، ساخته بر تعمیر ایسه یکیلک معناسنه کلز . عجبا مسائل مهمه ملیه مزمک ، اجتماعیاتمزمک روحی اولان مغنویات ، تجدددن مستغنی می در ؟ عقاید اصلیه نک صافیت اساسیه سی اعتباریله : اوت . لیکن تلقین وتلقی اعتباریله : حایر . بوحکممتی آکلاماق ، مغنویاتک لاقیدی ومترویت آلتندم سورونوب قلماسنه جواز ویرمک دیمکدر . عوامل وقوای اساسیه اجتماعیه سی مغنویاتندن

عبارت اولان اقوام ایچون اولیه بر جواز ، اعدام حکمنه مساوی دره .
 بنابرین تلقین و تاقی اعتباریله معنویات ده دخی تکامل و تجدد انکار
 ایدلمه‌لی دره . ائی بر محافظه‌کارلق ، تبدل و تغیری ممکن اولمایان
 اولیات و اساساتک ساخته برفن و اویدورمه بر ترقی ایله تخریبیدن
 و قایه‌سی دره . یوقسه تکاملات فیه‌نک ، تکاملات فیکریه‌نک قدرت
 تصریفی آلتیه دوشن اقسامی محافظه‌یه چالیشمق ، زمانک تصرف بی
 امانی انکاره قالدیشمق دیمک اولورکه بوهم غیر ممکن و هم‌ده مضر
 و مهملکدر .

بوکون علوم و قنون حاضر ددن مقبلس ولوکه ابتدائی معلوماتله
 مجهز بر انسان سائل و متردد ، قرون وسطی منطق و معارفیله اسکات
 واقناع ایدیله مز . بونک عکسنی ظن ایتمک ، امر تکاملدن غفلت و هر
 دورلو افکار فیه‌دن محرومیت معناسنه کلیر . هر زمانک بر احتیاجی ، هر
 زمان آدملرینک بر ذهنیتی وارددر . بوراسنی اصلا اونوتما‌لی دره .

بوکون ، مادیون مسلکی بر دنیسینریله مجهز بر کنج طالع ، خدمه‌دیندن
 برینه مراجعت و آرالرنده مباحثه جریان ایتسه ، عجبا ایکی مباحثک
 آکلاشامسی ممکن اولورمی ؟ عجبا کنج متردد ، اسکات و اقناع
 ایدیله بیلیرمی ؟ ظن ایتمه‌یز . اکثریت اعتباریله بویله بر مباحثه ، عالمک
 متفقنی تکفیری ، متفئنک عالمی تجهیلی ایله نتیجه‌پذیر اولور . فرض
 ایدلم که بویله بر متفنن متردد ، وجودباری بی انکار ایتسه ، کندیسنه
 ناصل مقابله ایدیله جک ؟ طبیعی آیات و احادیث ایله دکل ، زیرا بونلرک تاثیر
 و حقیقتی ایمان ایله مشروطدر . برمنکر ویا متردده بوسلاحله مقابله
 ایدیلز . دیمک بالضروره مباحثه‌یه بر شکل منطقی و فلسفی ویریلک اوزره
 متکلمین و علم کلامه مراجعت ایدیله جک ، وقیلله فلسفه و فنک مقدرت

زمانیه سی اعتباریله احضار وادخارایدیش اولان دلائل اوکه سوروله جک .
 لکن بودلائک ، قیمتدن زیاده صورت درمیان وسردی ، شکل وافاده سی
 اعتباریله ، سائی اقاع واسکات ایده بیله جکنی فرض ایدرسک ،
 شاشیلاق و آجیناجق برغفات کوسترمش اولورز . بویله برظن ،
 زمانی ومدنیتک معناسی ، بوکونکی تکاملات حیرت افزای فکریه بی
 یا انکار ویاخود آکللاماق اولور . بو حال وسویه ده قالان خدمه دین ،
 هیچ بروقت وظائف رهبری بی ایفایه مقتدر اولاماز ، اونلرک دائره
 نفوذ وموجودتی کیتدجه دارالیر ، نهایت یالکنز غیر متفکرلری ،
 جاهلری احتوا ایدن بردائره جکه منحصر قالیر . میدان ایسه حقیقی فقه ،
 صحیح ومثبت بر فلسفه یه دکل ، یارم متفکرلره ، فیلسوفسی آدملره ترک
 ایدیش اولور . بویله رهبرلرک برملتی سوق ایده جکی استقامت ،
 اضمحلال مادی ومعنوی یولی در . تورکجه سی بو ، اسلامیت وسلامتک ،
 وبنابرین بوملتک انقراضی اولور . ایشه بورالریخی دوشونه رک ، یازدیغم
 تحلیلی وتنقیدی تاریخ اسلامه ذیل اولمق اوزره شو اثری میدانه کتیردم .
 اثری اوقویانلر ، برطرفدن محتوی اولدینی مسائلک عظمتی ودیگر
 طرفدن بونک شهراه تجددده ایلك خطوه وایلك تجربه اولدینی نظر
 انصاف ومروته آلاق اثره نظر مسامحه ایله باقارلر ، مقصدک علویتی
 نیتک صفوتی حرمتنه برکله تشویق وتلطیفی دریغ ایتمزلر امیدندهیم .
 ظن ایدیله سین که شوسوزلرله اثرک نظر تنقید وتدقیقه آلهنما سی
 آرزو ایدیورم . اصلا . بالعکس آرزو ایده رم که ارباب تفکر وصلاحیت ،
 افکارمی تنقید ایتسینلر . تنقید ، ترقیات وتکاملات فکریه نک شریطه
 امکانی در . تنقیدک فقدانی دکل در که بزی عصر لر دن بری شو حال
 توقف وتدنی ده براقندی ؟ تنقیدک فقدانی دکل در که وسط علمیمزی

بر « آثار عتیقه موزه سنه » و یا خود بر « تربیه » و بزنی ده تربه دار لره
چو یردی ؟

اگر بهمه حال ترقی و تکامل ایستور سهق ، بونک شرائطی
آ کلاما من لازمدر . بوملتی اور و پادن کور کورینه واک عادیلری آراسندن
استعاره ایدیلن بش اون دستور فلسفی ایله بر قالب دیگره افراغه قالدیشمق :
شکلی اعتباریله قهقهه لرله کولونه جک ، فقط نتایج وخیمه و مهلکه سی
اعتباریله اغلا ناجق بر حالتدر . ذاتاً بویله برامل جاهلاننک ، ولو که
صفوت نیتله اولسون ، هیچ بر نتیجه حسنه و یره میه جکنی بالتجربه
کوروب آ کلامایان قالمادی . و صانیرز که اگر ذره قدر حمیت و اذعانلری
وارسه ، تقلید عامیانه نک مروج و عامللری ده بو حقیقی اعتراف ایدر لر .
علوم اجتماعیه نک البسیط ارشاداتندن در که افراد و جمعیاتده ارث ،
وسط و امکان توافق و استیناس ، قولی بو کولیمه جک عوامل قادره
طبیعیه دندر . بز ، بو قواعدی استخفاف ایده رک قوری بر تقلید ایله جدی
بر صورتده ترقی و تکامل ایده مه یز . بویله ساخته و قوف بر طریقته یالکیز
قیافتمزی و صورتیاتی مدنیلشدیره بیلیرز که بو بر تکامل اولما دقدن
ماعداً ذاتاً زو کورت اولان بزلی ، مقابل و عواملی اولمیان بهالی بر
معیشته سوق ایده رک افلاس کامله کوتوریر . اگر ترقی و تکامل ایتمک
ایستور سهق ، بر طرفدن اسباب انحطاطمزی ، دیگر طرفندن ده
هیأت اجتماعیه مزک عناصر مرکبه و مشکله سی نه لر اولد یغنی تدقیق ایتمه لی یز .
کیشی دوشدیک یردن قالدقار ، دیر لر . نه قدر دوغری در ! بزمیتمزی
میدانه کترین تمللری اصلاح و تقویه ، ترصین و ترمیم ایده جک یرده
[که حقیقی تجدد ، ترقی و تکامل بودر ،] بو تمللری حال خرابی ده
براقوبده یکی تمللر یابمغه قالدیشیر سهق ، معنای تامیله انتخابه تشبیه

ایتمش اولورز . لیکن شوراسی ده وارکه معنای ترقی و تجدد یابانچی قالیر ، وادی وبل توقف و انحطاطده وقفه کیر غفلت اولورسوق بو دفعه ده موجودیت اجتماعیه من ، فقر دم عرفانی ایله ، سورینه سورینه افول ایدر . ایشته بوتون متفکرین ملته و بومیانده هیئت تعلیمیه و دینییه پک ناچیزانه اولارق عرض ایتمکه اوغراشدیغ حقیقت بدیهیه بودر .

مدرسه لرك ، دارالفنونلرك اصلاحی و احتیاجات ملیه مزه تقابل ایده جك بر حاله افراغی ده خلی زمانه و همده شمیدیکی اوستون کور اصولر ایله بر جوق زمانه محتاجدر . بو خصوصده بوتون نقلی حکومتك صیرتنه یوكلتمك دوعری ده دكلدر . ذاتاً مدرسه و مکتب دینلدیکی کی هرشیدن اول خاطره اوقونه جق درس لر و باخصوص بو درس لره مخصوص کتابلر کله لی دکلکی در ؟

کتاب خصوصنده بزدن ده فقیر ملت آذرر . هنور مباحث و مسائل عالییه دائر یازیلش کتابمز یوق کبی در . همده نه حاجت ، بنم فکر بجه هنوز ائی برقرائت کتابمز ، اصلی و معقول بر طرز املامز بیله یوق . الآن بر طاقم قون جدید و فلسفه ایچون اصطلاحاتندن ده محرومز .

بواری اوبله بر طرزده تحریر و مباحثی تصنیفه چالیشدم که اوچ مقصدی بردن احتوا ایتسین . اثر ، اساس اعتباریله « واجب الوجودی ، نامتناهی بی » اثبات مقصدیله یازلمشدر . صوکراده بر ، « فلسفه مابعد - الطبیعه » کتابی وظیفه منی کوره بیلیر ، بوندن ماعدا مسلک مادیونه و مشرب کفره سالک اولانلرك کوسترمك ایستدکاری ادله و اسبابك فنا و حکمة قیمت و کیفیتنی واضح بر صورتله محاکمه و تنقید امکاتی ویریر . قنون موجوده لك صوك فکر لرینی و بونلردن صورت صحیحده

حقیقا بیلن نتایجله ترویج مسلك امليله حقسمز یره چیقاریلان نتایجی
« صرف فن و حقیقت نامنه وعالم مدیتک الکیوک علماسنک اجتهادات
وافکاری موجبنجه » میدانہ قویار . مباحثک عائدتی جهتيله برچوق
مسالك فلسفیه میزان تنقیده قونولدیغندن اثر ، قسماً تاریخ فلسفه
کتابی وظیفه سنی ده ایفا ایدر .

کنج علما و معلمینمز بو اثری دقتله مطالعه ایدر و تبعات ذاتیه سنی
فلسفه و فک اک سالم واک صوک دستور لریله و تردیف و توسیع
ایلر ایه ، نیم متور لریک یاریم یامالاق دیوشیرمه معلوماتی قارشیدنده
حبط اولق حجاتندن قورتوایر ، و محضاتنور مقصدیله اونلره مراجعت
ایده جک اولاد وطنه بر شکل فلسفی و فی ده حقایق اسلامیه نی ایضاح
امکانلری چوغالیر .

جمعیت تدریسیه اسلامیه اعضاسندن

« حکمت » صاحبی

شهیندرزاده فلبه لی

احمد حلمی

بروسه ، جوار اسماعیل حق

۱۵ تشرین ثانی ۱۳۲۷







برنجی کتاب

کفر و مسالک کفر [*]

برنجی مجت

کفر نادر و ممکن می در ؟

« کفر » جناب حق انکار ایتک دیمکدر . لیکن بوقدر عمومی بر تعریفه کفرک نه اولدینی آ کلاشیلاماز . لسان دینی نک جناب حق دییه تعظیم و تکریم ایتدیکی مدلول ، فن و فلسفه نقطه نظریه « مسبب نهائی ، سبب بلا سبب ، ذات مطلق ، ذات اکمل ، مرجع و منبع وجود » در . مسئلهیه بو نقطه نظره باقارسه ق ، کفر کلهسنه بر معنا ویرمکده زیاده سیله دوچار مشکلات اولورز .

علوم و فنون دیمک : حادثات اراسنده کی علاقه و مناسباتدن عبارت اولان قوانین ، اسباب و اجناس دیمکدر . شوخالده علوم و فنون ، قسماً توحید ایدلمش معارف انسانیه دیمک اولور . لیکن بویه بر توحیدی ممکن و مشروع عدا ایتک ایچون نهائی بر توحیده ، قوانینی دخی ارجاع ایده بیله جک « سبیدن مستغنی بر سبیه ، برووجود مطلقه » احتیاج قطعی واردر . بواحتیاج رد وانکار ایدلدیکی کبی علم وقتک تملی ییقیلیمش ،

[*] کفر Athéisme و کافر Athé

بشریتک افتخار ایتدیکی مدنیت و معرفت هیچه ایندیرلمش ، یکانه مسالک ریب و یکان ، بوتون معارف ظن و هذیان درجه سنه صوقولمش اولور . بنابرین شو اساسدن ایشه باشلارسهق ، کفرک ممکن اولمادیغنی کوریرز . عوام آراسنده ، اوج بش مبحث بلله یین نیم واقف و متورلر . آراسنده کافر بولونا بیلیر ، لکن بونلرک کفرنده بر شکل فنی و فلسفی موجود اولامایه جنی جهتله بویله بر کفر : جهل و بلاهت کی ناملرله یاد ایدیله لی در . جای بحث اولان بویله بر کفر دکلدز . مسئله میدان جهلدن میدان علم و تتبعه نقل ایدلیکی کی ، بالاده سرد ایتدی کمز سبیلر یوزندن فن و فلسفه اعتباریله کفرک امکانسزلغنه حکم ایتک لازم کلیر . لکن بویله بر حکمی تاریخ تکذیب ایدر . بشریتک تاریخ تفکراتی کوز اوکنه آلیرسهق ، ازمنه قدیمده اولسون ، زمانده اولسون ، فن و فلسفه نامنه اعلان کفر ایدن متفکرلر ، افکار کافرانه اوزرینه مؤسس مسالک فلسفیه کوریرز . عجبا بو آدمیر ، حقایق فیه و فکریه یی کوره میه جک قدر جاهل می ایدیلر که « فنا » کفرک امکانسزلغنه رغماً کافر اولدیلر و کفری بر مسالک فلسفی درجه سنه چیقاردیلر ؟

خایر . بو متفکرلر ، بو امکانسزلیکی پک کوزل مشاهده ایتدکلی ایچون ، سبب نهائی یی ، وجود مطلق رد وانکار صورتیله دکل ، بو حقیقتلری تحریف و منازل و مواعنی تبدیل صورتیله « فنا » کفری ممکن یاپدیلر . ایشه بو اعتبارله کفر : تحریف حقیقت « دیمک اولور . یعنی بو کافرلر ، وجود حقیقی یی و سبب نهائی یی انکار ایتمدکن اظهار عجز ایتمدکلر ایکن اونو « تعبیر حکمیسیله حقیقته ، تعبیر دینیسیله الوهیتته » مغایر بر صورتده تصور و بو حقیقت منزله و اوصافی تغییر

ایدیورلر. ایشته یالکز بو اعتبارله کافر درلر. ادیان ، بلکهده تعمیم
نتایجی اعتباریله ، کفر کلمه‌سی باشقه شکلده قبول و تعریف ایدر .
مثلا ادیان کوره جنلره ، بر روح اعظمه ، بتلره طاپان بر آدم کافر در .
لکن فلسفه‌نک نقطه نظری بویه دکدر . پت پرستک حق و وجود
مطلق حقنده کی افکاری حقیقه موافق اولماغله برابر کندیسنک مقصد
ونیتی دوعری در .

کندیسنه « جاهل ، مخطی ، مشرک » کی اوصاف ویریلسه بیه
کافر دنیله مز ، زیر اولنک قصد ونیتده « حقیقی بر شکل علمیده
تحریف ، اوصاف الهیه یی انکار » جهتی یوقدر . بالعکس ، نه قدر
جاهلان اولورسه اولسون ، مقصد ونیتی « اقرار و تصدیق » دن عبارتدر .
بوراده بر ملاحظه دها وارد خاطر اولور . ادیان ابتدائی ونا
قصه اربابنده اولسون ، ذهاب باطل اصحابنده اولسون ، حس دینی
تمامیله محفوظدر . بوتون یالانلر ویا کاشمقلر ، بو حسک اظهار و تطبیقده
کوریلیر ، لکن اساسده کوریلیر .

بر آغاجه ، بر بته ، برداغه طاپان وحشی‌نک وجدان و معتقداتی
تحلیل ایتسهک ، معبودنده بشریت و طبیعت فوقنده بر طاقم اوصاف عالیه
فرض ایتدیکنی ، اوندن خیر و شر اومدیخی ، اونده بر اراده عاقله
بر قدرت ذی وجدان کوردیکنی تسلیم ایده رز. دیمک که وحشی ، الهی انکار
ایتمور ، یالکز قدرت علمیه و دماغیه‌سی حقیقه قدر واصل اولمایه رق
، بو حقیقتک بعض سر پینتلیخی ، یا کلس اولارق ، بریره عطف ایلمور .
شو حالده وحشی ، فلسفه نقطه نظریله کافر دکدر .

لکن حقایق موجوده یی فن و منطق قوتیله تحریفه چالیشان
وغایه تحلیلده « الوهیت و حقیقت » نوعتی حائر اولمایان بر « تصویری »

حق و حقیقت یرینه قویمغه اوغراشان بر آدم ، حس دینی دن دخی تجرد
ایتمش و کفری « قصداً و علماً » مسلک ایدینش دیمک اولور . شو حالده
کافر عنوانه حق قازانیر . مبحث آتی ده ایضاحات کافیه ویره جک
ایسه که ده شیمدین سویله لم که : کافر اولمق ، جداً مشکل و متعسر
بر ایشدر . بیکلرجه سنه در ، ادراک و وجدان بشرک نیجه بیک محتله
ابداع ایده بیلدیکی منظومه حقایق یقمغه قالدیشمق وهله کندی وجدانی
بو حقایقک انوار فیاضدن محروم ایده بیلیمک ، شایان حیرت بر جسارت
و غیرته توقف ایدر . عوام مرتبه سنده قالنلرک وهله مسائل فیه
و فلسفیه دن اوچ بش سوز بلله یئرک کندیلرنده مسائل عالیه حقیقه
بیمحابا فکر لر در میان ایتک قدرتی کورنلرک ایسه اظهار ایتدکری
اشکال فکریه انکاریه بی ، کفر لفظیله توصیف اصلادوغری اولمایوب
بو قیل کسانه « جاهل ، احمق ، سفیه » کی اوصاف کافی و وافی در .
بوصفه منسوب کسان هر مملکتده وارد و حتی چوقدر . بوده
هیئت اجتماعیه بشریه نک شیمدیکی شکل منفورندن ایلری کمکده در .
مع مافیه احتمالک بوشکل ، بشریتک طبیعتی و استعداد جنسیسی ایجابی در ،
یعنی چاره سی بولونامایه جق امراضدن بری در . هر مملکتک عوامی ،
بالذات دوشونمک ایسته مر ، بکیر که کنیدیسی ایچون باشقاری دوشونسون .
صوکراده هر شی حقیقه بر فکر صاحبی اولمق ایستر ، وبالطبع ، سویه
و احتیاج اجتماعیه نک موافق دوشن و یا خودده کنیدیسنه اک موافق
و ماهرانه صورته تقدیم ایدیلن افکاری قبول ایدر . بوافکارک نه درجه یه قدر
موافق حقیقت اولدیغنی ، نتایج علوم و فنونه توافق ایدوب ایتدیکنی
محاکمه دن عاجزدر .

انسانلر ، وهله عوام ، حریت ایله استقلالی تفریقدن همان هاند

عاجز لر در لر ، حتی افاضل و متفکرین بشر بیله ، چوق کره بوفر قی « عملاً » تأسیس دن اظهار عجز ایدر . استقلال ، بشریتک شرف و کالی دیمک اولان قیودی [که سلسله حقایق دن عبارتدر] آتمغه میالدر . انسان ، انداک و معالیمی یوزندن نه درجه ممتاز و مستثنا اولور سه اولسون ، طبیعت و جسمانیتی اعتباریله « جمله حیوانیه » یه منسوب اولمقدن قور تولامن ، هرا انسان ، عالی و سافل بر سوری اوصافک ، بر سوری احتیاجک مجموعی دیمکدر . اکثریت بشریه ، خیالی و جامع فضائل بر انساندن زیاده بهیمیه متقرب و متمایلدر . بهیمیتک خاصه ممتاز سی ایسه « استقلال » در . قیودی علم و فضلی ، اغلال حقایق و اخلاقی کردن انقیاده طاقان « جوهر حریت » ابکن « استقلال بهیمی » بوقیودی طاشیمق ایسته من ، طاشیاماز . مسلاک کفر ، اکثریت بشریه یی تشکیل ایدن عوامک متمایل بولندیغی حب استقلالی « بالضروره » انتاج و تسکفل ایدر . بوسبیه مبنی مسلاک کفر ، بر قسم عوام آراسنده وهله لذت حیاتی دها آنی تقدیر ایدر بیلیمش نیم متفکر لر ، ذوق پرست و میال سفاهت شهر لیلر آراسنده پک قولایلقله جای قبول بولاییلر . باخصوص مسلاک کفرک اساسندن زیاده تفرعات و نتایجی پک قولایلقله تعمیم ایدر ، بوسورتیه هیئت اجتماعی ده نظری دکلسه بیله ، عملی بر صورتده بویوجک بر « کفر تقلیدی » صنفی میدانه کلیر . اوروپا هیات اجتماعی سی بزه بویله بر صنفی ارائه ایتدده در . بوصنفه داخل اولان انسانلر ، ایکی قسمه آریله بیلیر : وسعت معیشته مالک و ذوق و سفاهته سالک نیم متتور لر له اک سیاه احتیاجات ایچنده یو وار لانان سفیللر . برنجیلرک سائقی ، وجدانی معاتبه دن قور تارارق هر شناعتی ، هر دنائی ارتکاب ایچون کویا فنی و حکمی بر معذرت و سبب تدارکی در .

وجدان اخلاقی حقیقه کی افکار هر نه اولورسه اولسون ، بو کونکی
تظاهر اته کوره « ظلم و رداشته راضی اولمایان و حق باطلی هیچ اولمازسه
حسن صورتیله تفریق ایدن » خاصه انسانیه در . بو خاصه اسکات
ایدلدکجه اخلاقسزاق دائمی بر عذابی موجب اولور . صباحک غیر
مشروع ذوقی اقسامک عذاب وجدانیسیله تلخ کام اتمه مک ایچون
وجدان اخلاقی بی ارادن چیقارمادن باشقا چاره یوقدر .

عجبا بر درجه متصور و جهلدن بر درجه قورتولمشلر نزدنده وجدان
اخلاقی ناصل اسکات و احما ایدیله بیلیر ؟ هیچ شبهه یوق که وجدانک
مواد مشکله سی حکمنده اولان دساتیر حکمیه و اخلاقیه بی حکمدن
اسقاط و اونلرک موضوع و باطل شیلر اولدیغنی اثبات اتمکله . بومکروه
وظیفه بی آنجق مسلك کفر درعهده ایده بیلیر . حقایق قیه و فلسفه
تحریف و تخریب ایدیلرک انسان ، شجر و حجر مقوله سنه ایندیریلیر ،
فکر الهی ارادن چیقاریلیر ، سعادت : ذوق بیسمیدن ، احتراصاتی ممنون
ایتمکدن عبارت بر اقلیر ، مسئولیت و عقبا و بقای روح انکار ایدیلیر ،
و الحاصل هر فرد بشرده کی حیات و موجودیت ، تکرری غیر ممکن
بر تصادف اثرندن عبارت فرض اولونورسه ، اخلاقک ، وظیفه نک ،
فداکارلغک ، امیدک بر معناسی قالیرمی ؟

واقعا وجدان اخلاقی یه اتباع و فضائی اجرا ایچون « مسلك اقرار »
کافی در ، و هر مصدق فاضلدر ، اخلاقی در ، دینیله مز . مع التأسف
بشریت ، ایملک و کوتولک ممزوجه سی در . شوقدر که مسلك تصدیق
و حقیقتک « ایجاب ضروریسی » اخلاق و معالی ایکن مسلك کفرک
« ایجاب ضروریسی » اخلاقسزلق ورد معالی در . بر حالده که بر
مصدق فغانی « مسلك ایجابنه نظراً » ناصل شاذ و مستثنا ایسه بر

کافرك آييلكى ده « مسلك كفر ك ايجابنه نظر آ » اويله جه شاذ و مستنادر .
 بو ، ردی غير ممکن بر « دوستور فنی و قطعی » در . دلیل و اثباتی
 ایسه بر طرفدن تاریخ بشرو دیگر طرفدن استقرا آت علمیه در .
 تدقیقات تاریخیه ، محاسن و فضائل صاحبی بر چوق کافرلرک
 موجودیتی کوسستریر . لکن بومشهودات ، مسلك كفر حقنه کی
 حکمی بر وجهله چور و ته مز . بومشهودات بیله مسلك كفری اتهامه
 سبب اولاجق شیلر در . زیرا بر کافرك صاحب محاسن اولماسی ،
 مسلكك ايجابات منطقیه سی اولمادقن ماعدا بومسلكك ضدینه بر
 حرکت و برتناقض در .

شوراسی ده وارکه بر هیئت اجتماعیه ده اک بویوک فلاکتلری موجب
 اولان جهت « کفر عالمانه » دکلدر . طبقه علیای بشر آراسنده تداول ایدن
 افکار ، بر صورتله ترقیات علمیه و فیه نی موجب اولاجنی ایچون ، هر شکل
 و صورتده لزوملی و محترمدر . لکن بو افکار [تعمیم ، عوامه
 تشمیل vulgarisation] صورتیه طبقه عوامه نشر ایدیا بیرسه ، ایشه
 تهلمکه او وقت یوز کوسسته ریر . بنابرین بو کی افکاری تعمیمه
 قالدیشانلر ، معنای تامیله بر جنایت اجتماعیه ارتکاب ایتمش اولورلر .
 ایکنجی قسمه کلنجه : بونلر ، سفالت و محرومیتک پنجه سنده
 زبون قالان زوالیلر در . دوچار اولدقلری طاقفیر سا سفالتلر ، بیک
 دورلو محرومیتلرله قادر و عادل بر خالقک موجودیتی تردیفه مقتدر
 اولامادقلری ایچون کفر و انکارله تشفی صده ، صانکه خدادن
 انتقام آلمغه چالیشیرلر . بو طبقه آراسنده افکار کفریه پک قولای
 نشر ایدیا بیر . باخصوص ایشه بر ازده سیاست قاریش دیر یلار ق بوسفالتلر ،
 افکار دینی نه تک تولید ایتدیکی شکل اجتماعینک مولودات ضروریه سی
 کی کوسسته ریا بیرسه .

ساحه عالمه مشهور اولان [مادی و اخلاقی شر Mal physique, moral] ایله بر خالق اکمل وارحم فکرینی تردیف حقیقه زور و حالا هیچ بر داهی نك حلقه مقتدر اولامادینی بر کیفیتدر . واقعا بر جوق حکما و علما شری « خیرنا قص ، محرومیت » و سائر کبی شکلله توصیف و تأویله چالیشمشلر ایسه ده بونلرک قناعتبخش اولمادینی و مسئله نك اخلاق عمومیه مضراولمایه جق بر صورتده حل ایدیله مدیکی میدانده در . بویله دیورز ، زیرا بومسئله « وحدت وجود » افکار یله حل ایدیله بیلیرسه ده بو افکارکده بر شکل عامیانه ده انتشاری ، کفری دکلسه بیله ، کفر قدر اخلاقسزلنی موجب اولدینی بالتاریخ ثابتدر . حتی افکار عالییه بی تألیف و تردیف ایدمه ین عوام ، وحدت وجودی دار بر معناده و عادی بر شکلده تلقی ضرورتنده قالدیغندن بوتلقی ایله کفر آراسنده بویوک فرق بولق ممکن اولاماز . شیمدی ده بومسئله حقنده صحائف تاریخیه بی براز قاراشدیر لم .





ایکسجی مبحث

مشهور کافر لر ، کفری انتاج ایدہ بیلن

مسالك وافكار

ادیان و فلسفہ دن ہر برینک کفر حقندہ کی نقطۂ نظری نہ درجہ
فرقلی اولدینغی مبحث سابقہ براز ایضاح ایتدک ، مسئلہ نک اہمیت
عظما سنہ بناءً براز دہا ایضاحات ویرہ جکیز . فلسفہ نقطۂ نظریلہ کفر ،
شایان تقدیس بر ذات اعلائی ؛ قصد مخصوص ایلہ انکارہ چالیشمق ،
یوانکاری دلائل علمیه ایلہ اثباتہ قالیشمق وذات مطلق یرینہ بو نعۃ
حائر ارلمایان و اولمادینی شہادت فن و وجدان ایلہ مفہوم اولان دیگر
برشیئی اقامہ ایتمکدر . [*]

متصوفین اسلامیه نک مسلککاری دہ کوزلجہ تتبع ایدیلیرسہ ، کفر
حقندہ کی فکرلری بعضاً بوکایتین و بعضاً تماماً ضد اولدینی آکلاشیلیر .
مثلاً جناب محی الدین ک فرعون ک کفرینہ قائل اولمادینی حقندہ کی
روایت صحیح ایسہ ، مسئلہ یی ایکسجی نقطۂ نظریلہ محاکمہ ایتمش اولماسی

[*] بونقطۂ نظر غایت مهمدر . تبلیغات رسالک ایریشمدیکی محال انسانلری
حقندہ ازمنۂ ماضیہ دہ نہ مهم و حرارتلی مباحثہ لر جریان ایتدیکی معلومدر .
بونقطۂ نظر تعمیق ایدیلیرسہ ، نیجہ افکار متضادہ نک تردینی ممکن اولدینی تظاہر ایدرہ .

لازم کلیر . فی الواقع فرعون حقننده کی مؤدالره نظراً مرقوم وجود
الهی بی حتی نبوت موسی بی بیله بیلمز دکلدی ، یالکز شقاوتندن ،
عنادندن ، حسدندن بو حقایقی اعتراف ایتموردی . شو حالده فرعون ،
فلسفه نقطه نظریله تام بر کفر ایدی ، زیرا بو کفری عن جهل دگل ،
قصداً و علماً ایدی . لیکن کفری ایکنجی معناده یعنی « وجود باری بی
بیلمه مک » ، « حق جهل » معناسنه آیرسهق ، شبهه یوق که فرعون
کافر دکلدی ، زیر اللهک وارلغی بیلنوردی .

ادیان نقطه نظریله باقیلنجه : بر دینک اصولنه مغایر فکر بسلهین
کافر عد اولنور . حتی بوجهت تعمیم ایدیلهرک فروعه بیان مغایرت
کوسته رنلرک تکفیر اولوندینی تاریخنده چوق کوریلیر . بر چوق
الهییه طایان و آراتق دینلری کولونهجک منظومه خرافات حالی آلان
یونانیلر ، کندیلرینه نسبتله پک یوکسک فکرلی بر متفکر اولان
« آناقساغوراس » ی تکفیر ایتشلردی . سوقراط ، وحدت الاهییه
قائل بر داهی ابدی ، بویله ایکن بت پرستلر کندیسنی کافر عدا ایتشلر
و تسمیماً اعدام ایتشلردر . آریستو دخی تکفیر ایدلدی . افلاطونک
زیاده سیله سوء ظنه اوغرا دینی و یاقاسنی حقایقی رموز و حکایات ایله
ستر سایه سنده قوتار دینی مورخلرجه تحقق ایتشدیر .

قرون وسطاده قربان ظلم و اعتساف اولان ، آتشلره یاقیلان
متفکرین چوقدر . جوردانو برونوکی هر سوزی نغمه وحدت اولان
بر وجدان عالی و حساس ، کافر دییه دیری دیری آتیه آیلمشدر .
فیلسوف دهقارتک زماننده « راهب مرسهن » یالکز پارسده الی
بیک تکفیر ایدلمش آدم صایاردی !

دهقارت ، ایسپینوزا ، لوق ، قانت ، فیخت کی نیجه اعظم

متفکرین هب تکفیر ایدلش لدر . ایشه کوریلور که کفر و تکفیر خصوصلری پک زیاده تشمیل ایدلش ایسه ده بومتفکرلردن اکثریت عظاماسنه فلسفه نقطه نظریله کافر دینیه میه جکی میدانده در . فی الواقع اونلر حقنده عالم فن و حکمت صوکر ا باشقا درلو حکملر ویرمش وچوغی کافر عدایدلمدکن ماعدا بعض فکترلری اثبات صانع دائر خصوصات ایچون ادله حکمنی آلمشدر . شیمدی ده یاکندی اعترافلری ویاخودده مسالک فلسفیلری ودها دوغریسی افکار مخصوصه لری سبیلله کافر عدایدیلان متفکرینی کوزدن کچیره لم .

تاریخ فلسفه ده ایلك دفعه کافرنامیله یادایدیلان آدمک ، مهلوسلی دیورهن اولدینی آ کلاشیلور . بوذات ، لوسیپ وده موقریت طرفندن ریاست ایدیلان ، « جزؤ فرد » مدرسه طبعیوننه منسوبدر . بومدرسه منسوبینی برموجود مطابق طانیاز وکائناتی اجزای فردو حرکتله ایضاح ایدردی . کفر ایله اشتهار ایدن فیلسوفلرک بری ده سوفسطائی پروتاغوراس ایدی . بوذات ، موجوداتی هوا ، صو ، آتش کبی عناصردن برندن پیدا اولمش عدایدن یونان مدرسه سنه منسوب ایدی .

شو ایکی مدرسه نك ، اوافق بر نظرله ، ازمنه قدیمه مادیون مسلکی و انکار مذهبی اولدینی تظاهر ایدر . مع مافیه یونان مدرسه سنه منسوب اولان فلاسفه نك هپسنی بلاقید وشرط مادیوندن عدایتک دوغری دکسه ده بو ، مسلک لرینک ایجابندن زیاده شخصلرینه مخصوص برتناقض سبیلله در . مادیون مسلکی ، سالکینده صرف کندی وجدانه مخصوص وشبه سزکه مسالک اعتباریله متناقض بر اقرار اولماق شرطیله ؛ هر سالکینی بالضروره ورطه کفره سوق ایدر .

مادیون مسلک‌کننده ، اوصاف و نعوت مطلقه صاحبی بر خدایه هیچ بر موقع اولمادقندن ماعدا اونی ولو که بر شکل مبهده تصورده لزوم و امکان یوقدر . مادیونه کوره یکانه حقیقت [*] ماده‌دن عبارتدر . بر حالده که ماده ، ذات مطلق یرینه اقامه ایدلمشدر . واقعاً مادیون قوتی ده انکار ایتزسه‌ده اونی یاسبب الاسباب عد ایدیلهمیه‌جک بر حالده تصور ویاخود ماده‌نک بر خاصه‌سی ، برصفتی عد ایدرلر . اعصار اخیره مادیونندن بعضیلری ماده و قوتدن هر برینی عین مرتبه‌ده عد ایدره‌ک برنوع « ثنویة فلسفیه » فکرینی اظهار ایدرلر ، بعضیلری ماده و قوتک دخی ذهابسیط وابتدائی برشیثک ایکی شکل متظاهری اولدیغی درمیان ایدرلر . مع مافیه بوتصور مجهوله نعوت الهیه‌دن هیچ برشی اضافه ایده‌مدکاری کبی بالعکس بر چوق انکار و نفیلرله اونی شایان تقدیس و مودت نعوتدن تجرید ایدرلر . ماده‌نک هیچ بر صورتله تصوری موجود مطلقه معناً و ذاتاً معادل اولامایه‌جغی ایچون بومسلکک ایجاب ضروریسی کفر و انکاردر .

مادیونک موجود مطلق و اکمل فکرینی ماده ایله تأویل نه کبی یوللرله چالیشدیغی مباحث مخصوصه‌سنده برتفصیل ایضاح اولونا‌جغی جهتله بوراده تطویل مقاله لزوم یوقدر . یالکیز شیمیدین شوراسی نظر مطالعه‌یه آلتیمالی درکه مادیون مسلک‌یه اقرار واجب الوجود اصلاً تردیف ایدیلهمز . وبومسلکه سالک نه قدر صمیمی متفکر ظهور ایتش ایسه هپسی‌ده « کفر » ی مسلک‌لرینک بر نتیجه ضروریه‌سی اولارق تلقی ایتشلر و کافر عنوانی قبولدن چکینه‌مشردر . مسلک

[*] حقیقت ، ذهنتک مقابلی و خارجی بر موجودیت صاحبی دیمکدر . علم احوال‌الروح حقنده کی اثرمنده ایضاحات واردز .

مادیونک بللی باشلی واساسلی پرنسپلرینی قبول ایدوب ده عین زمانده موجود اکلی اقرار ایدنلر ایسه ، ادراک بشرک یکانه میزان تمیزی اولان « عدم تناقض » قانوننی آیاق آلتنه آلمش و ممکنسر برتردیف وتالیفه قالقیشمش صایایلر .

تاریخده اسملرینی کوردیکمز کافر لر دن ایکی مهمی ده « سیردناییک » مدرسه سی منسوبلرندن « ته اودور » و « اوهه مر » در . بومدرسه فلسفه ، وادی کفره یالکیز علوم طبیعه طریقله کیمکله اکتفا ایتیمه رک فلسفه اخلاقی ده آلت ایتک سوداسنی کوستر مشدر . اونلره کوره انسانده ادراک و معنویاتک اساسی اک قابا احساسات و برده سوق طبیعیدن عبارت در . بومدرسه ده کی اساساتدن ، حیون مسلیکله اولان مناسبتی آکلاشیلیر . حیون مسلیکی انسانده فطری واصلی اولارق هیچ بر اساس زکائی قبول ایتمز ، بوتون احساسات و افکار ، انطباعات خارجیه دن و بونلرک تکاملاتندن عبارتدر . شو حالده بومسلیک ده دونه دولاشه دیگر بر طریقله مادیون نتیجه لرنده قرار قیلا بیلیر . دیمک که حیون مسلیکی ده ، اکثریا ، کفره موصولدر .

لامپاسقالی استراتون ، تاریخده کوریلن مهم کفره دن بری در . کندیلی هر نه قدر اساساً ده موقریتک مدرسه طبیعیننه منسوب ایسه ده افلاطون و آریستونک واسع و مکمل مسلیکلرینک انتشارندن صوکر ا ظهور ایتش اولدیغندن استادینک صرف « میخانیکی » اولان مسلیکنی قابل مدافعه بولمایه رق عالمده ماده دن ماعدا برده قوتک وجودینه حکم ایتمشدر . بوقوت موجوداته شکل و خواص ویریر ، حادثاتی تنظیم ایدر . و ماده ده مندرج در ، یعنی خارجی دکل « دینامیکی » در . شو قدر که بوقوت ، کور بر قوتدر . استراتونک « طبیعت » نامنی

و یردیی بوقوت ، زکا ، حس ، و وجداندن محرومدر .

استراتونك طبیعت نامنی و یردیی بوکور قوت ، موجود مطلق ، واجب الوجود دکلدر . نهات کوربر قدرتدر . بوسبیه مبنی استراتون دخی کافرلردن معدوددر . استراتونده موقریتك پره نسیپلریله آریستونك محرك اول فکرندن قوت صفحه سنی استعاره ایدرهك مادیون مسلکنه ممکن اولان مهم برخطوه یی آتدیرمشدر ، برحاله که زمانزه ده علوم وفونندن استدلال ایدیلن صوك نتیجه استناداً مسلک مادیونی فی مثبت برمسلك کی صاتمغه قالدیشان دو قوتور بوختر ایله معلم ارنست ههکل ، استراتونك افکارینی توضیح ، تفسیر و تزییندن باشقه برشی یامش صایلماز .

بوراده بر اخطاره لزوم کوریورز . برمسلك فلسفی ده کی بعض افسکار متفرعهك وحتى قبول احترازیه ایله بعض افکار مهمهك قبولی اومسلكی تماماً و بوتون نتایجله قبول صایلماز ، و صایلا مایه جنی ایچون مسلکك تمامندن چیقان حکم ضروری اوکا عطف ایدیه مز . مثلاً ده موقریتك اجزای فرد نظریه سنی ، ایکی بیک سنه صوکر افسکلز حکمای طبیعینندن مشهور « دالتون » احیایتمش و بونظریه یی زیاده سیله ترقی ایتدیرمشدر . بوکون حکمت و کیمیا ، اجزای فرد نظریه لرینی اسالاساس اتخاذا یتمشدر . عجیbamادیاتك جزؤ فردلردن متشکل اولدیغی قبول ایدن ، مادیون مسلکك بوتون قواعدینی قبول ایتمش و مسلک کفری اختیار ایتمش صایلیرمی ؟

هیچ بر وقت .

مادیون فلسفه یی سالکلرینی کفره سوق ایدن اجزای فرد نظریه سی دکل ، اصل الاصول اولارق کور بر میخانیکیت و یاخود

مفروض نعوته مالک بر دینامیکیت ایله جامد بر هیولایی قبول و بویله جه حقیقتی و وجود مطلق انکار ایدیشلری در . ده موقریتك جزؤ فرد نظریه سنی ، متکلمین اسلامیه نك قبول ایتد کیرینی حتی مسلک لرنده کی ایکی اسانندن بری بونظریه اولدیغنی سویلر سهك ، بومسئله نی تماماً حل ایتمش اولورز . استراتون ایله معاصر اولان فلاسفه مشهوره دن « نه پیکور » دخی ده موقریت مدرسه سی منسوبیتندن اولوب کافر لر آراسنده صاییلیر .

نظارتدقیق ازمئه متقدمه دن قرون وسطی یه وهله قرون اخیریه تحویل ایده جك اولور سهق ، اوروپا انتباه علمی وفکر یسنك باشنده ایکی ذات کوریرز که بونلرک بریسی انکلتزه باش وکیلی مشهور « باقون دووهرولام » ودیکری فرانسر « ده قارت » در . باقون ، کافر لر صیراسنه ادخال اولوناماز سهده مادیون مسلکنی احیا ایدنلرک بر قسم مهمی اونک اصولندن ملهم عد اولونور ، ناصل که ذهنیون و روحانیون حتی بعض وحدت وجود مسلک لری ده ده قارتک اصول وافکارینه منسوب صاییلیر .

قرون اخیر ده مادیون مسلکنک اک صمیمی مروج لرندن بریسی باقونك شا کرد ومعاصر ی « هوبس » در . فلسفه وباخصوص فنون تجربیه ومثبته کیتد که تکامل ایتدیکندن مسلک کفر ده اولکی [قطعی ، Dogmatique] شکافی ترک ایده رک مسروداتی بو تکاملاتله تردیفه باشلامشدر . مثلاً فلسفه یه نفس انسانی بی تدقیق دن باشلامق کبی جهتلر طبیعیات اوزه رینه مؤسس افکار عمومیه ومهمه یه ترجیح ایدیلکه باشلانديغندن تصدیق واقرار طرفی کبی کفر وانکار طرفی ده یکی شکل لر آلمشدر . ایشته هوبسك مادیون افکارینه منجر اولان مسلکی ده ، زکای بشرک اکسیک بر تحلیلندن حصوله کبشدر .

لكن مادیون وحسیون وبالنتیجه كفر مسلكك رینك اك بویوك
تعممی اون یدنجی عصر میلادی ده مشهود اولور . كفر فلسفه فی نك
بودرجه تعممی ، فرانسه انقلاب کیرینی میدان کتیرمش اولان
تعصب واستبدادك شدتیله متناسب برعکس عمل یوزندن حصوله کلمشدر .
خریستیانلق ، بوتون قوتیله حریت فکریه بی احایه عزم ایتمش
ایدی . بوتون افکاری دار برعقیدهیه تردیف ایتك ، ترقی رد
وانكار ایله مك ، بشریتی منزله توقفده جبراً طومق : ایشه کلیسانك
یایمق ایستدیكى ممکنسزشی .

کلیسانك بوامیلیه علوم فنونك ترقی ونكاملی وهیئت اجتماعیه
ده تبدلات واصلاحات غیر ممکن ایدی . صوك درجه شایان عبرت
غرائب شئون تاریخیه دن دركه کلیسا ، بوتون بوشدتلری خریستیانلق
وعقیده و اخلاق دینه نامنه اجرا ایتدیكى حاده اساساً مدافعه ایتدیكى
بعض پرنسپلرك وهله تفرعاتك دین عیسی ایله هیچ بر مناسبتی
یوق ایدی .

خریستیانلغك وحشیانه دینیه جك برشدتله مدافعه ایتدیكى ،
محافظهیه چالیشدیغی مواد ، خریستیانلقله هیچ بر مناسبتی اولمایان
آریستونك بر قسم افکاریه بطلمیوسك منظومه فیه سی ایدی !
أوت ، صوك درجه شاشیلاجق غرابدن دركه علم هیئت وكائنات
حقنده بت پرست بطلمیوس كبی دوشونمه یں بر کیسمه کلیساه کافر عد
ایدیلیورردی . عقاید خریستیانیه ، دینیه بیلیركه ، بحسب التحلیل ،
آریستونك مسلكنه استناد ایدیورردی ، محرك اول ایله هیولانك
آری آری وهربری مستقل وازی برر موجودیت اولدیغنی قبول
ایدن ، ثنویه فلسفیه مسلكنك پیری صایلان مشرك آریستو ،

خریستیانلغك ايكنجی عیسایی منزله‌سنه چیقاریشدی ، آریستویه
اعتراض ، کفر صایلیبوردی !

حالبوکه اوروپا ساجه تفکری بوغریب استبداده راضی اولاجق
ممثلندن آزاده قالمش ، باقون وده قارتك ارشاداتيله علوم وقنون
وفلسفه یکی بر مجرایه کیرمش ایدی . خریستیانلق بو تجدد اصولی
وفکری یه اولاقهر وتنکیل ايله مقابله ایتدی . جوردانو برونو ، موجودیت
الیهیی عالیجنابانه بر عشق وشوق ايله حس واقرار ایدن اوزکای عالی ،
بر کافر صایلیدی و دیری دیری آتشلره یاقیلدی . جوردانو برونونك
بللی باشلی کفری ایسه بطلمیوسك افکارینی و آریستونك اصول
واستبدادینی رددن ، افلاطون و پلوتن ، وهیئت جدیدیه میلدن عبارت
ایدی . ایتالیان وانینی ده ، هر تصورك فوقیده بر وحشته اشکنجه
ایدلکدن صوکر احرار اولندی . حبس وتضییق ، نفی وتحقیر
اولونانلر ایسه لایحصى ایدی .

آرتق بودر جمله وار ان ظلم وتضییقندن بوتون وجدانلرده او یله
بر اکراه اویانمش ایدی که بر شکل دینی یه عائد قالمق لازم کلن تباعد
ونفرت ، حقایقه وفکر الاهی یه قدر تشمیل ایدلمش ویاواش یاواش
مسلك کفرله ذوق حریت و آرزوی ترقی یکدیگر لرلندن تفریق
غیر ممکن شیلر ظن ایدیلکه قدر واریلمش ایدی .

افکار عمومیه نك بوشکل تفکری غایت مهم اولدیغندن صورت
حصولی حقیقه رازدها ایضاحات ویرمه لی یز .

ادیان ، اساساتوجید بارینی واساسات اخلاقیه یی تبلیغه مأموردر .
هر دینك حکمت وشریعتی بوتیلیغاتك مجموعی در . لکن ازمئه ماضیه ده
علوم وقنون وهله فلسفه ، مستقل بر صورتله موجود دکندی .

خاصوص فنونك مبادی حائده بولونیشی ، فن و فلسفه یه عائد مباحث
ایچونده انسانلرك دینه مراجعتی موجب اولیورددی . رؤسای
روحانیه ، کتب منزله و روایات مقدسه ده موجود اولمایان بوتفصیلاتی ،
کتب و روایاتده کی اساسلره بر صورتله تردیف شرطیله ، خارجدن
طوبلایوردی . لیکن بوخارجدن طوبلایان معلومات ، رؤسای روحانیه نك
آغزندن چیقمش و دین نامه سویله نیلمش اولق سببیله ، برمدت
صوکرما مواد مقدسه دینه میانه داخل اولیورددی ، برحاله ده آرتق
منشأی آرانمایان و آرانسه بولونامایان بوقیل معلوماتی ردوانكار ،
صانكه اساسات دینی یی انكار و یاخود بواساسلرك انكار ایدیلدیكنه
تلامت فرض اولونوردی .

تمادیا ترقی و تحوله ، انقلاب و تکامله تابع اولان معلوماتی ، غیر
متحول بر شکلده طومتغه فالقیشانلرك حالی ، جهل مرکب توصیفه
لایق ایدی . زیرا بویله برشیئتك ممکن اولاجغنی فرض ایتك ، اك
قدرتلی عامل و متصرف اشیا اولان زمانی و دیمك كه دولایسیله شریطه
حیاتی اكلاماق ایدی .

بوخالندن دینلر صوك درجه متضرر اولمش ومع التأسف بو
ضررلرك دهشتی بیله رؤسای دینه نك دیدة انتباهنی آچامامشدر .
طبیعت بشرده مرکوز و هیچ برقوتله قلع و محاسنی غیر ممکن اولان
استعداد ترقی ، بوقدر موانعه رغماً اجرای فعالیت ایتدكجه ، اساسات
دینی یه قاریشمش اولان موادك مقرون حقیقت اولادینی اكلاشیلور ،
وبونلرك زاده جهل و ظن ، مولود شعر و منطق اولدینی بالتجربه
ثابت اولدكجه اونلرك یالانندن اساسات دینی یه دخی بر حصه اصابت
ایدیوردی . رؤسای دینه ایسه ، بشریتك شوتكاملاتندن عبرت

آلارق اساساتی چوروك ضمیاتدن تصفیة ایدەجك یرده بشریتی بویوندیریق آلتنه آلمغه چالیشیوردی .

اولا تفكر وترقی طرفدارلری ضعیف ایدی ، لکن کیده کیده طرفینك قوتلرنده بر موازنه پیدا اولمغه باشلادی . ایشته اووقت ، دین نامنه عصرلردن بری اجرا ایدیلن قهر و تضییقه قارشى شدتلى برعكس عمل ظهوره کلدی . مادیون فکرلری ، بر طرفدن فن و تفكر عالمی و دیگر طرفدن نیم متفكرلر صنفی استیلا ایتدی . ایشته مشهور انسیقلوپه دیك تحریری بوزمانه تصادف ایدر .

بوحیط معارفی یازانلرك مہملری دیدەرو ، ودالامبردر . دالامبر ، ریپوندن معدود اولوب دیدەرو ایسه مادیوندن صاییلیر .[*] انسیقلوپه دی ، بالاده سردایتدیکمز سبیلردن ناشی بالکمز دینته دکل ، غیر صحیح جملری یاننده افکارعالیه فلسفیہ دخی بویوك ضربه لر ایتدیرمشد . آرتق ادراك نورانی بشرله جهل و تعصب ، خرافات و اکاذیبی کندینہ مال ایدن دین و ایمان آرسنده علنی مجادله و مبارزه باشلامشدی .

آنسیقلوپه دی محررلرندن اول انکایز « لوق » ادراك انسانى بی تحلیل ایتمش و صوك حسیون مذهبك تملارینی آتمشدر . لوقك اجتهادینہ کوره انسانده منابع معرفت ایکی در : احساسات و تفكر [یعنی وجدان] حواس خمسہ ایله حصوله کلن احساسات ، بزه عالم خارجی بی ، وجدان و تفكرله وقوع بولان حسیات ، باطنمزی بیلدیریر . بواجتهاده کوره معارف بشریه تجربه دائره سنی کچه مز . نهائیات ایسه تجربه

[*] بزه قالیرسه دیدەرو ، مادیون مسلکندن زیاده وجودیون مسلکنه منسوبدر . دیدەرو ایله المانیالی مشهور شاعر و فیلسوف غوته نك فکرلری يك متشابهدر . هرایکیسی ده عقاید معروفه دن تبعاعد ایدیورلر رسه ده جمله موجودیتی صورت تلقیلری وحدت وجود فکرینه ده ایقیندر .

دائرہ سنہ کیرہ میہ جکندن ذات مطلق ، حقایق اشیائی، ذاتیاتی بیلیمک غیر ممکندر .

لوقی مادیون آراسنده تعداد دوغری دکلسهده مسلیکی کفری مؤدی اولدیغی حقنده کی اجتهاد ، اکثری متفکرلر طرفندن قبول ایدلمشدر . فی الواقع حق هیچ بر صورتله معرفت و حقایقه ایصال اطلاع ممکن عد ایدیلزسه دین و فلسفه عالیه ملعبه فکریه دن عبارت قالمز می ؟ اکثری مدققلر ، بوسبیه مبنی لوقی مشاهیر کفرین آراسنده تعداد ایدر . بزہ قالیرسه لوقک مسلکندن بویله بر نتیجه چیقاریلا- بیلیرسهده دیگر نتیجه لرده چیقاریلا بیلیر ، ناصل که ایسپنسر ، هان عین افکاردن اقرار نتیجه لر ی چیقارمشدر . لوقک مسلکندن مادیون مذهبی ایچون بر فایده ملحوظ اولمادیغنه کلنجه : بوراسی قطعاً محققدر . مثلاً « فکریه مطلقه » مسلکی صاحبی « برقله ی » ک بوتون مادیاتی انبکاردن عبارت اولان افکاری ، لوقک پرنسیپلرینه استناد ایدر .

لوقک افکارینی حدنهایسنه کوتورن متفکرلرک بریسی برقله ی ایسه ، دیگریده « داوید هوم » در . بومتفکره کوره بوتون عملیات فکریه « جمعیت افکار [*] » اساسندن عبارت اولوب « ذات ، نامتناهی ، سبب و سائر » کبی افکار ، حادثات متسلسله دن باشقارشی دکدر . برقله ی ، ماهیت مادیه یی ، بر مجموعه اطلاعات دن عبارت عد ایتش و کائناتی مجموعه احساساتمز فرض ایتسکه مادیاتی ظل و خیال ضایمش ایدی . داوید هوم ، عین اصولی نفس انسانی و معنویاته تطبیق ایدرک « ماهیت مغویه و روحانیه » یی ظل و خیال مرتبه سنه ایندیرمشدر . هوم کوره انسانده عینیت و وحدت کیفیتلرینی خاثر کورولن « بئلاک »

[*] علم احوال الروح نام اثر مزده بومبشک تفصیلاتی واردر .

برسلسلهٔ اطلاعاتدن عبارتدر . شو حالده بووحدت وبوعینیت برظندن باشقا برشی اولمایوب بوطنی میدانہ کترین جهت ایسه اطلاعاتک اینانیلمایه جق برسرعتله یکدیگری تعقیب ایتمه سندن حصوله کلیر . بو حسابہ کوره وحدت وعینیتی ، علت وسببیتی افاده ایدن بوتون افکار ضروریہ ، برر مجموعهٔ اطلاعاته منقلب اولارق روح ، مایہ ، ذاتیت والہ فکترلرینک هیچ برحقیقتی قالماز . هومک مسلکی ذاتیت مادیه ومعنویہ نی انکاردن متحصل « ریدیۂ مطلقہ » دن ، بر « حادثوت مطلقہ » Phenomenisme absolu دن عبارتدر . شو حالده داوید هومی سر آمدان کفردن صایمق پک دوغری در . فی الحقیقه رب مفرط بالضروره هر حقیقتی وبومیانده حقیقت غائیہ یی انکاره منجر اولور . آنسیقلوبه دی محررلرینک رئیس دیده رویی کافر لر صیراسنده تعداد ایتدک . مشهور دو قنور قابانیسی ده کافر عد ایتمه جکز . واقعا بومتفکرک ایلک آناری مادیون مسلکی خاطرہ کتیر مکده ایسه ده اک صوک اثرنده کائناتک زکا ایلہ متخلق برسببی اولدیغنی اقرار ایتدیکندن وحدت وجوده قائل اولان متفکرین عالیہ زمره سنه التیاق ایتشدور .

بوفلسوفلرله معاصر اولان راهب « قوندیلیاق » واقعا حسین مذهبی رؤاسندن ایسه ده روح والہی اقرار ایتدیکنندن ولوکه بر تناقض اثری اولسون ، ینه بو اقراری نظر دقته آلق واونی کافر لر صیراسنده کورمه مک لازمدر . حالبوکه « لامتری » و « بارون دولباخ » صورت قطعیه ده مادیونندن وارباب کفردندر لر .

لکن مادیون مسلککنک ، کفر مذهبکنک اک بویوک تکاملاتی عصر حاضر متفکرلرندن « بوخنر » ، « اوغوست قونت » ، « معلم

آرنست همکدل « و « معلم لودانتق » ده مشهود اولدیغندن بونلردن
بر قاجیله « داوید هوم » و راهب « قوندیلیاق » ک افیکاری تحلیلی
ایدیلیرسه ، مادیون ، حسیون و ریونیون مسالکیرینک بوتون محتویاتی
میدانه چیقار .

بومبختدن قارئلرمزه معلوم اولمشدرکه مسالک فلسفیهدن مادیون
مسلمکی بهممه حال وبالضروره کفری انتاج ایدر . ریب مفرد مسلمکی
ده بویله در . حسیون مسلمکی ایسه بالضروره منتج کفر دکلسمده
اونده کی قواعدک افراط و یاسوء تلقیسی کفری انتاج ایده بیایر .
الک مشهور مادیون و کفر مسلمکیرینی برمبحث مخصوصده تدقیق
ایده جکمزدن بومبختک تطویلندن صرف نظر ایلیه جکمز .





ایکسنجی مبحث

فن و حکمتك ساحه لری

فن کله سی ، بوکون تنور و ترقی نك قیمتی حس ایتش اولان هر فرد عننده بر جاذبه سحرانه یی حازدر . ناصل اولماسین که بو کون جمله مزك عیون تقدیرینی قاماشدیران بونجه بدایع صناعیه و تکاملات انسانیه هب فن سایه سنده در . بنا برین « فنه نظراً » ، « فن ایجابی » و « فنوندن مستبان اولدیغنه کوره » کی ترکیلردن بر بله تقویه ایدیلان فکر ، غریب بر قوت اظهار ایدر . لیکن بو « فن » کله سی هله علوم و فنونك حالت حقیقه سندن نیم خبردار و یا خودده جزوی معلومات المش اولانلرك اغرنده او بله بر سوء استعماله او غرار که اک صوکنده « مصنف مرحوم بو بورمش که . . . » حمله سنی خاطره کتیریر . هله بزم کی هنوز طریق ترقی و تکامله کیرمکه جالیشانلرده نیجه عجول کیمسه لر کوریلور که « فلان شی ، فنا بویله در . » دیدیکی حالده کندیسنه : فن نه در ؟ « سؤالی صوریلیرسه ، هر حالده اویدیرمه و غیر فنی بر جواب ویرینور .

مع مافیه بویله بر سوء استعمالك یا لکز نیم متورلر و یا مقلدلر نزدندمه بولدیغنی ظن ائمه مه لی در . برقاج فن ده احتصاصی ، و بوتون فنون حقنده معلومات کافیه سی اولان بعض متفکترلر بیه « فن و فنی » کله لرینی سوء استعمال ایده ییلورلر .

مبحث مخصوصنده ، ارباب فن محض ك احوال وافكارينه استناداً
اراه واثبات ایده جكمز وجهله مادیون مسلك فلسفه سنی « فن » ك
صوك سوزی اوزره صاتمق ایسته نلر ، هب بویه برخطایه دوشمكده
وقنہ انترا ایتكده درلر .

بونك برقاج سبی وار . عوام ونیم عالمدرده كوریلن سوء استعمالات ،
تبعك نقصانندن وهر ایشیدیلن سوزلری بلا تدقیق قبول ایتكدن
نشأت ایدر . متفنن وعالمالرجه ایسه ، یارقناعت فلسفیه نی بهمه حال
قنه استناد ایتدیرمك غیرتندن ویاخودده حرارت مناقشه ومحاوره ایله
فن وحكمت آراسنده کی حدودی اونوتمقندن ایلری كلیر . تاریخ
افكاری تدقیق ایدنلر ، شوراسنه متحیر قالیرلر كه : فن ایله نظریات
فلسفه نی قاریشدیر مامنی برقاعده درجه سنه چیقارانیروحتی بوخصوصی
مسلكلرینك اسالاسی یابانلریله فن وحكمتی قاریشدیرمق خطاسنه
دوشمكدن كندیلرینی قورتاراماشلردر . مثلاً فلسفه شیه مسلكی
صاحبی « اوغوست قونت » ك ویاخود « معلم هه كل » ك یابدقلری كی .
دیمك كه بوبابده ایضاحات كافیله ویرهرك افكاری تنویر لازمدر .
واقعا « متافیزیک - فلسفه مابعدالطبیعه » مباحثیله بوكی مقدماتی
قاریشدیر مامق لازم كلیر سهده مع التأسف مملكتمزده هنوز تدریسات
فلسفیه تعمیم ایتدیکندن وشواریسه هر نوع قارنك استفادسی ایچون
یازیلدیقندن بو ایضاحاتك لزومی تقدیر اولوبوز .

نوع بشر ایچون اوچ درلو « معرفت ، طانیه Connaissance » ممكندر .
معرفت عامیانه ، قیه ، وحكمیه .

معرفت عامیانه : مادام الحیات ، تجاریب شخصیه ومشاهدات سطحیه
ایله ، اختلاط وتلقینات عادیله ایله بیلینن شیلردر . معرفت عامیانه ،
مفردات اشیا ومحسوساتی بیلش دیمك اولور .

معرفت فیه : اشیا آراسته کی مناسبت و علاقہ فی بیلیمکدر . شو
 حالده فن : متمادیا تحول و تبدل ایدن حادثاتی دکل ، بو حادثاتہ حاکم
 اولان ، بو حادثات کبی تحول ایتہ یوب ثابت قالان « قانون » لری
 بیلیمک دیمکدر . آریستو ، برشی منفردک فی اولماز ، دیمشدر .
 شو تعریفلردن معرفت عامیانه ایله معرفت فیه آراسته کی فرق
 عظیم ظاهر اولور . عامیانه معرفت حادثات جهانی ، مشهود محسوس
 اولدینی و جہلہ ضبط و معرفتدن عبارت ایکن معرفت فیه ، بو حادثاتی
 اداره ایدن اسباب و علاقہ فی معرفتدر .

عوام حادثاتی اولدینی کبی قبول ایدر ، بر حادثہ نک « ناصل »
 اولیہ اولدینی تبصر و تجربہ ایله آکلامق لزومی حس ایتمز : حادثہ یه
 بر سبب فرض ایتدیکی اولسه بیلہ ، چوق وقت بوسبب ، فنا قانون
 اطلاقه شایان دکلدر ، زیرا بر استدراک متفکرانه نتیجہ سی دکلدر .
 متفنن ، ایسه حادثہ فی ، اوجنسدن حادثات ایله مقایسه ایدر ،
 برنده و دیگر لرندہ ثابت و دائم قالان اسبابی کشف ایلر ، بونیده
 دقیق بر تبصر و عمیق بر تجربہ نتیجہ سنده یاپار . حادثہ نک « ناصل »
 پیدا و پایدار اولدینی و « ناصل » تبدل و استحاله ایدہ جکنی آکلار .
 بر قانون دیمک اولان بویله بر معرفت : « فن » نامنی آلیر .

بعض حکما و متفکرین ، زکای انسانی نک قدرت فی بو معرفتده
 تحدید ایتشلردر . اونلره کورہ زکای بشر ، معرفت فیه دن ایلری
 کچہ من . زیر تبصر و تجربہ آنجق حادثات اوزرندہ ممکن در . تجربہ سی
 ممکن اولمایان تصورات ایسه ، دائرہ فن دن خارج قالیر ، اثبات و توثیق
 ممکن دکلدر ، شو حالده ظن و اعتقاد جملہ سنہ ، و یا خود ذهاب و خرافات
 زمرہ سنہ داخل اولور . « پوزیتیویزم » مسلک نک فکری بویله در .

اونلر ، بوقاعده موجبنجه الله ، ذات ، ماهیت ، سبب نهائی ، مطلق ، اکل ، نامتناهی ، کبی فکر لری طاقت زکای بشرک دائره احتواسی خارجنده بولورلر . وبونلرله اشتغالی ، معرفت لری ممکن اولمادیغی ایچون ، عبثله اشتغال عدایدرلر . بوقاعده دن انحراف ایتمه یین متفکئر ایچون ، بوتصورات عالییه یی اقرار کبی ، انکار دخی معاسر ومغایر فن در . دائره فن دن خارجه چیقماق عزمنده بولونان برمتقنه : الله وارمی در ؟ « سؤالی صوریلسه : الله برحادثه دکلدر ، بنابرین دائره حس وتجربه یه کیرمز ، شوحالده بودائره یه کیرمه یین برتصورک وارلغی بوقلغی حقنده فنک بر فکر و حکم در میانه صلاحتی یوقدر . » جوابی ویریر .

شو حالده « محض فن » دائرمنده قالان وفن ایله مناظرات فلسفیه یی قاریشدیرمایان برمتقن نظرنده « ریسیون » مسلکندن ماعدا مسالک فلسفیه عین مرتبه ده ظنیات ووهیاتدن عبارتدر .

بو قسم متفکئر نظرنده مادیون مسالک فلسفیسنک ، روحانیون ویاخود فکریون مسالکندن ، مزیت فیه اعتباریله هیچ بر فرقی یوقدر . یعنی هر ایکسی ده عین حکمله ، عین عدم قبول حکمیله محکومدر . شو ایضاحندن آکلایلیرکه مادیون مسلکسک ، سائر مسالک فوقنده اولارق ، فیه مستند بر مسلک اولماسی حقنده کی دعوالر ، تماماً مردود ومجروحدر . مسلک کفر ، مسالک اقرار فوقنده هیچ بر امتیازه مالک دکلدر . بوتون مسالک فلسفیه کبی ، اونیده محاکمه ایدمک اولان حاکم صلاحیتدار ، بوتون معلومات بشریه دن استعانه واستفاضه ایتمکده وعین زمانده بومعلوماتی ممکن ومغیدار قیلیمقدم اولان « خاصه عقل » در .

لکن عجبا محض فن دائره سنده قالمق ادعاسی دوغری می در ؟
عجبا فنك بوشکلی ، احتیاجات بشریہ بی کافل می در ؟ حتی دها آجیغنی
سویلیلم : بر دائره محدودده قالمق ایله بالذات فن ممکن می در ؟
حایر !!

ادراك بشر ، بر حادثه نك يالکز « ناصل » اولدیغنی صور مقله
قناعت ایده مز ، حایر ، انسان هر سوالی قطع ایده جک بر مبدأ
وحدانی به واصل اولمایجه سکوت ایلیه مز . ادراك بشر ، بر حادثه نك
« ناصل » اولدیغنی آکلایجه ، « نیچون » ایله اولدیغنی صور مق
اضطرارنده قالیر . بو سوأل ، هر متفکرک و حتی بویله برسؤالک ،
لزومنی انکاره چالیشانلرک بیله ابدی اندیشه سی در . بشریت بواندیشه بی
دائما حس ایتشدر ، واونده عشق و آرزو ، حرمت و مودت ،
میل معالی و شفقت ، درک راحت و سعادت کی افکار و حسیات عالیه
باقی قالدجه بواندیشه بی حس ایده جکدر . دها قطعی سویلیلم : معرفت
عامیانه ایله قناعته مقتدر اولما دقجه هر فرد ، بو سوالی صور مقده مضطر
وبوکا بر جواب بولمغه محتاجدر . حکمت اولمایجه فن دهممکن و متصور
اولماز . زیرا قوانین ندر ؟

حادثات آرا سنده کی ثابت مناسبتلر ، علاقهلر . پک کوزل . شو
حالده قوانین فیه : هیچ بر حقیقت خارجیہ سی اولمایان ، آنجق ادراك
بشر طرفنده مشاهده ایدیلن ، یالکز ذهن انسانده بر موجودیتی
اولان « مجردات Abstractions » دن عبارت ! اکر بوقانونلر ، بر
موجود حقیقی نك مقاصد و اوامرینی ، ضرورت موجودیتی ، شؤن
و تظاہرینی اعلان و بیان ایتیمورسه ؛ اکر بوقانونلر ، بر حقیقتدن ،
لا یتحول ، ابدی ، نامتناهی بر موجودیتدن انبعاث ایله میورسه ،

برقیمتلی قالیرمی ؟ وشو حالدفن ، برمنظومه وهم وطن برجموعه
قیل وقال ، والحاصل زاده ذهاب وخیال اولمازمی ؟

اگر بقوانین ، موجودیت حقیقه صاحبی ، نامتناهی و مطلق
برذاتیه ، بروحدانیه استناد ایتدیریلیرسه ، اووقت اونلرک برمعناسی ،
برقیمتی اولور. هپسی جانلانیر . لیکن بو استنادکاه ردوانکار ایدیلیرسه ،
اووقت بوقانونلر ، ادراک بشرده تصوروتوهم ایدیش اولمقدن باشقا
برموجودیته مالک اولامازلر ، هپسی جانسزومعناسز قالیرلر .

بنابرین بشریت یالکیز « ناصل » سؤاله ویریلن جوابلره قناعت
ایده میهرک ، اونجوابلری آلدقدن صوکرار ، انلره برقیمت وحقیقت ،
برسخت وثبوت ویره بیلیمک ایچون « نیچون » سؤالی ده صورازو بسؤاله
جواب آزار. ایشته بسؤالی صورمقله برابر دائره قدن چیقارقدن دائره حکمتیه
کیرمش اولور. بسؤالی صوران ادراک اوکنده بوتون حادثات ، لایحیی
حروف حکمتیه ، بوتون قوانین واسباب نامحدود کلمات شکلنه کیرز. بو
خروفه اساس اولاجق برنقطه نامتناهی لازمدر ، بوکلماتی تلفظ ایتدیره چک
وبرمعنا ویردیره چک روح ایجاب ایدر . سبیدن سبیه ، قانوندن قانونه ،
ماهیتدن ماهیه ، انتقال ایده ایده غایه تحلیل وادراکده سبیدن مستغنی
برسبیه ، ابداع وایجاددن مستغنی بروجوده ، حدود وتعیندن مستغنی
برذاتیه ایصال اطلاع ایلر ؛ وبوتون مدرکات ومعلوماتی بواسالاسه
ارجاع ایتمکله احتیاج روحی وادراکیسنی اشباع ایتمش اولور .
بو صورتله حاصل اولان بیلکی « معرفت حکمیه » نامنی آیر .


بویله برمعرفتی ، امکان ولزومنی انکار ایتمک بوش برشی در .
هله بومعرفتک محصول تجربه اولمادیفی بهانه سیله عدم امکان ولزومنه
قائل اولمق ، تجربه ایچون بیلله ضروری اولان اساسلری انکار دیمک

اولور که بویله بر انکاره علم دیمکدن زیاده جهل و عناد و عشق کفرنامی و یرمک ایجاب ایدر .

شو ایضاحاتک دقتیجه تلقیسندن منفهم اولور که فن و حکمتدن هر یرینک کنسینه کوره بر مالکانه سی واردر . هرایکیسی بومالکانه دائره سنده قالمق شرطیله صحیح و مفیددر . لکن فن ، ساحه حکمته ؛ و یا خودده حکمت ساحه فقه تجاوز ایدر سه ، یکدیگرندن آلا جقلری چالماجه نتیجه لر هیچ بروقت صحیح عد ایدیه من . هیچ بر حقیقی متفنن ، مناظرات فلسفیه کیریشدیکی وقت ، مسروداتنک محض فن اولدیغنی ادعا ایتمز . بونکله برابر فنک حکمته و یا حکمتک فقه هیچ بر لزومی ، هیچ بر معاوتی یوقدر معناسی آکلا شیلما مالی در . بالعکس فنونک ترقیاتی ، ساحه حکمتکده کوندن کونده از زیاده تنورینی موجب اولمقددر . کذا حکمت تکمل ایتدجکه فنونک مباحثی برقات دها صحت و جاذبه قازانمقددر .

شیمدی ده دیگر بر نقطه یی تدقیق ایده لم . عجبا ساحه فن دن ایلری کچمه مک ادعا سنده بولونان ، فلسفه مافوق الطبیعه یی انکار ایدن ، نهائیان انکار کی اقرار کده فنا معناسی اولمادیغنی در میان ایلین متفکرلر ، سوزلرنده دور مشلر ، دور ایللمشلمی در ؟ ظن ایتمز . مبحث آتی بود عوامری تنویر ایده جکدر .





اوچونجی مبحث

شایان عبرت بر ترجمه حال :

اوغوست قونت و فلسفه سی

اوغوست قونت ، ۱۷۹۸ سنه میلادیه-سنده دوغمش در . مون پهل یه اعداد یسندن شهادت نامه الدقندن صو کر اپاز سنده کی « پولی تکنیک » مکتب عالیسنه کیرمش ایسه ده مشربی اطاعته مساعد اولادیغندن ا کمال تحصیله موفق اولمایه رق مکتبی ترکه مجبور اولمشدر . برمدت سوسه یالیزم مدرسه سی رؤسا سندن « سن سیمون » ک تلمیذی اولمش ایسه ده اونکله امتزاج ایده میهرک آرالر ی آچیلمشدر . قونت ک ایلك اثر مهمی ، ۱۸۲۲ سنه سنده هنوز یکر می دورت یاشنده ایکن یازدیغی « سیاست مثبتیه منظومه سی » در . اک بویوک وفلسفی اثری ایسه ، ۱۸۴۲ سنه سنده ا کمال ایتدیکی « فلسفه مثبتیه درس لری » در .

اوغوست قونت ، زمان حاضرک اک بویوک داهی لرندن بری در . فرانسز لیره ، روبن ، انکلیز ستوارت میل ، غروت و بیلن ویل کی اعظم معاصرین ، قونت ک تلامیذی جمله سندن بولوندیغی کی مشهور فیلسوف « هربرت اسپنسر » دخی ، کندیسنک انکارینه رغماً ، قونت ک تلمیذی صایایر .

اوغوست قونت ک حیاتی ، سفالت ماده و مغنویه نك اک طاقت فرسا- لری نی جامع بر فاجعه عبرت آمیز در . بوداهی بی نظیرک اوصاف کاشفه سی

بر طرفدن زکای شامل ، وسعت نظر ، خاصه ابداع و ایجاد و دیگر طرفدن ايسه شدت وحدت ، هضمسزلق و امتزاجسزلق و خصوصيله استبداد و مطلقیت فکریه ایدی .

اطاعتسزلیکی یوزندن طرد ایدلیکی « پولی تکنیک » مکتبده آچیلان ریاضیه معلم و ممیز لکنه طالب اولمش ايسه ده اويله بر داهییه « اوستروم » نامنده بر متخصص ترجیح ایدیلدی .

آجدینی خصوصی درسلدن ده برشی قازانامیوردی . زواللی داهی بویوک بر احتیاج مادی آلتنده ازیلیوردی . زماننده کی علما و حکمانک و هاله بر موقع رسمی طوتمش اولانلرینک مقفوری و چونکه محسودی ایدی . اوت ، بوندن کالای معلوماتلری اسلاف دستکاهندن چیقان حاضر ماللدن عبارت اولانلر ، مکتسبات علمییه لری اقوال اسلافی بیللمکدن عبارت قالانلر یعنی رفاه و ثروتک یوالی بولانلر ، بو مجدد علمییه ، باشقالرینک فکری اوکنده باش ایکمهین بوداهییه متمادیا عداوت کوستریبورلردی . شهسز اوغوست قونتک بوتون افکاری دوغری دکلدی ، ایچلرنده یک یا کلشلیری ، یک مفرطلری و حتی یک مضرلری واردی . بونکله برابر جداً دهاسنی اثباته کافی عالیسلری ، صحیحلری ده واردی . خصوصاً فن دائره سنه محصور قالانلری ایچنده نیجه عصرلر ارباب تفکره سرمایه و مبدأ تفکر اولاجقلری چوق ایدی . ارباب حق و حسدکده الک زیاده اعتراض و تنقید ایتدکاری ایشه بویله فیکرلردی .

اوغوست قونت ، برداهی ، بر مجدد اولماسنه رغماً معارف نظارتینک ، دارالفنونلرک مظاهرتنه نائل اولمادینی کی اثرلرینکده ابتدا سوروملک احتمالی آزایدی . حالبوکه اودماغ مخترعک بر چوق فیکرلری موقع

و نام صاحبی علماً طرفندن سرقت اولونیور و کندی ماللری ایتمش کی میدان تداوله قونیلوردی . صوکراده قونت ، بوسه قتلردن ناشی تظلم وشکایت ایتدکجه ، کندیسند قاراسودا حسته لغی بولندی اشاعه ایدیلوردی . فی الواقع زواللی داهی بوقدر ثقلت متراکمه یه تاب آور مقاومت اولامادی ، ۱۸۲۶ سنه سنده کندیسند اختلال دماغی آناری کوریلدی . لکن آرزمانده کسب عافیت ایتدی . تماماً کسب عافیت ایتدیکنه « فلسفه مثبتہ درسلی » نام اثری شاهد عادلر . لکن قونت هیچ بروقت محاسده ، مخنت وسفالتدن قورتولامادی . نہایت ینہ تجنن ایتدی و ۱۸۵۷ سنه سنده بودارجدالدرن کوچدی ، کیتدی . شیمدی ده قونتک مسلك و افکارینی تشریح ایدلم . قونتک فلسفہ سی ، سن سیمون مسلك اجتماعیسند قنون ریاضیه و مثبتہ دستورلردن اشتقاق ایتدکده در . شو حالده سن سیمونیزم و تجربہ مسلكلری مولودی دیمک اولور . مع مافیه سن سیمون مسلك اجتماعیسنک برچوق نظریاتی ، فی نظرلره فدا ایدلمش اولدیغندن قونتک مسلكی برسیای مخصوصه مالکدر .

اوغوست قونتک فکرینه کوره زکای یشر ، اسباب اولیه و اسباب نایه نی فہم وادراکدن تمامیلہ عاجزدر . یعنی انسان مبدأ موجوداتی بیلیمکدن عاجز اولدینی کی موجوداتک ناصل برغایہ تعقیب ایتدیکنی ، نیچون ایتدیکنی حتی معین برغایہ سی اولوب اولمادیغنی بیلیمکدندہ عاجزدر . شو حالده سمندادراک ایچون میدان جولان اولارق بواکی حدک اورطہ سی قالیورکہ بوندہ میدان قندن عبارتدر . دیمک کہ اوغوست قونتہ کوره مبادی و اولیاتی ، والہی ادراک غیر ممکندر . کذا بر فلسفہ ما فوق الطبعیہ غیر ممکندر . فلسفہ ما فوق الطبعیہ عائد

مسائلدن هیچ بریسی شمیدی یه قدر حل ایدیه مامشدر . نیچون ؟ زیرا او مسائل ، زکای بشرک قدرت اختوا و اطلاعی خارجنده در . دقت ایدیلمه لی در که قونت بومسائی ، انکار ایتیمور . مشاور الیهک اک زیاده اعتراض و شدتله ردایتدیکی مسیلك ، مسیلك کفر در . مادیون مذهبی اونک یاننده اصلا جای قبول کورمنز . اونک نزدنده مادیوندن برکافر ، عقیده منقیه صاحبی برفقیه کفر دن باشقا برشی دکلدن . اوکا کوره مادیون مسیلكی ده بر نوع فلسفه مافوق الطبیعه در . [*]

بوسبیه مبنی قونت ، مادیون مسیلكی ده ، روحانیون ، وحدت وجود و سائره کی مسیلكی ده قبول ایتیموردی . کائناتده بولونان اسبابله کائناتی ایضاح : ایشه قونتده کوره غایه فن .

بونا فکر اساسیه نك تفصیل و ایضاحاته کنتجه : قونتک مسیلكی ده ایکی تائی مهم کوریلیر . بریسی مبحث تاریخی ، دیکری تصنیف علوم . قونتده کوره ادراک بشر اوج دوره کچیر مشدر . اولاً عقیده و اعتقاد دوره سی ، ثانیاً فلسفه مافوق الطبیعه دوره سی ، ثالثاً دوره مشته .

برنجی دوره ده ایکن انسانلر ، حادثات طبیعی بر ویا بر حوق خالق وارواحک مداخلات کیفیه و اراده سی ایله ، خوارق و معجزاته ایضاح ایدردی .

[۴] اوغوست قونتک بودعواسی پک دوغری در . مبحث مخصوصنده کوریله چی اوزره مادیون مسیلكی ده ، صاحب لری نك ادعایینه رغماً ، دوغماقی برفلسفه مافوق الطبیعه در . زیرا اونلر ، حقوق الکبیه بی مغایر عقل و فن اولارق ماده و عقلاً مجهول و غیر مثبت بر هیولایه عطف ایتمکدن ، الله یزینه بر ماده میهمه اقامه ایله مکدن باشقا برشی یاپیمورلر .

بودوره ، بشریتك دورۀ طفولیتی دیمكدی . بشر ، اووقت هنوز سالم و جدی بر اصول تبعه مالك و قادر دكدی . حالو كه ولو كه حالت ابتدائیه اولسون ، انسانده آكلامق احتیاجی واردر . بنابرین بر صورت طبیعهده ایضاح و فهم ایده مدیكی حادثات لایحصای طبیعتی ، عالم و آدم فوقده بر ویا بر جوق قدر تترك موجودیتیه ایضاح اضطرارنده قالیوردی . بو عملیه یی یابقی ایچون ایسه ینه كندی اشكال ادراکیه سنه مراجعت ایده رك ابداع ایتدیكی ارواح و اشخاص خارقه نمایی مخیله سنده کی الوان ایله تزیین و كندی سنده کی تنوع و اوصافی بو یولته رك اونلره عطف ایدیئوردی .

ایكنجی دورده ، بو ارواح و اشخاص یرینه بر طاقم اسباب مجرده ، موجودات معنویه اقامه ایدلدی ، بو مجرداته ، حقیقی بر موجودیتیه مالك ایشلر كی اعتقاد اولوندی . طبیعت ، بر عملیه ذهنیه ایله فهم ایدیلكه ، تجربه و تبصره احتیاج كوریلكسزین ایضاح اولونمغه قایل بشلدی . ایشته بو دورده اعتقاد و دین ایله برابر فلسفیه ما فوق الطبیعه رك حكیمفرما اولدینی دورهدر .

اوچونجی دورمه كنجه : حادثات آراسنده کی ارتباط و علاقۀك ، هر حادثیه تقدم ایدن و او حادثۀك شریطه سی و سببی دیمك اولان حادثۀك ، تجربه و تدقیق نتیجه سنده فهم و كشی ایله اکتفا اولوندی كه بوده « فنون و فلسفه مثبتة » دورمه سی در .

فنون حاضر مینی میدانه كتیرین بو اوچونجی دورمه و فلسفه مثبتة اصوللری در . اصول مثبتة ، متافیزیک یعنی ما فوق الطبیعه اصولی یرینه قائم اولمشدر . مسائل معلقه فکریه دن هر هانکیسی تجربه دایره سنه صوقوله بیلیرسه ، متافیزیک ساحه سندن فنون مثبتة ساحه سنه منتقل

اولور . هر نه که بر صورت قطعيه ده معاينه تجريبه داره سنه کيرمز ،
 ساحه فندن چيقار يلق لازمدر . اوغوست قونت ، يالکز بو قدرله
 اکتفا ايتمش اولسه يدي ، انکاري ممکن اولمايان و فونونه دخي اساس
 اولان اولياتي انکار ايتمش وساحه تبعدن چيقارمش اولقله برابر «فن»
 خدمت و چونکه ساحه فني صيقي بر صورتله تحيد ايتمش صاييليردي .
 لکن فکر بشر ، حدود فنده قالمغه مقتدر اولمايوب اوليات و حکمته
 احتياج قطعي ايله محتاج اولديغندن بر آرز آشاغنده تفصيلاً ذکر
 ايديله چکي اوزره ، اوغوست قونت ، کندی چيزديکی حدودده کندی ده
 دورا مامشدر .

«فن» خدمات موقته سندزدولاني تشکر ايتدکن صوکرالاهي ،
 تعظيماته حدودينه قدر سوق ايتدی! «کي سوزلر سويله مه سي» اوغوست
 قونت ک کفر ايله اتهامي موجب اولمشدر .

قونت اعتقاد، متافيزيق و فنون مثبته تقسيماتي تاريخ نقطه نظريه
 و عموميت اعتباريله بر درجه قدر دوغري ايسه ده فلسفه اعتباريله بو تقسيمده
 او قدر قطعيت يوقدر . اعتقاد، حکمت و فن آري آري ساحه لر اولديغندن
 برينک وجودي ديکرينک کيني نافي صاييلاماز . بو کون هم متفنن ، هم حکيم
 و هم ده صاحب اعتقاد و ايمان يک چوق متفکر موجوددر . بنا برين
 ير انسانک ساحه فنده اصول مثبته يي قبول ايتمش اولماسي ، فلسفه
 عاليه يي رد ايتمه يي موجب اولاجني اصلا ادعا و اثبات ايديله مز .
 قونت بو تقسيمی ، ادراک بشرک سير طبعي عيني و احتياج صميميني
 ارايه ايدر ، ايسته او قدر .

قونت مسلك كننده کي ايکنجي تلقی به کلنجه : بوده تصنيف علوم

مبحث مهمنی احتوا ایدر. بو تصنیفه کوره بوتون علومه اساس اولمق اوزره علوم ریاضیه باشده کلیر. یعنی انسانلرک ایلمک تنظیم ایتدکاری علم، ریاضیاتدر. صو کرا: هیئت، حکمت طبیعی، کیمیا، علوم حیاتیه، علوم اجتماعیه کلیر.

بو آلتی علم، علوم اساسیه اولوب هر برینک شعباتی وارددر. قونتک شو تصنیف بر چوق اعتراضاته هدف اولمقله برابر تاریخله مصدقدر. لکن تصنیفک اهمیتی بو نقطهده اولمایوب اخیراً ایسپنسر طرفندن بوتون ساحه علومه تطبیق ایدیان تکامل نقطه نظری مبادی حائده خاثر اولماسی در.

قونتک نظریاته کوره بو تصنیف بر «سلم علوم» اولوب هر علم بو مردیوه نك بر باصاماغنی تشکیل ایدر، بر حالده که ایلمک باصاماغه حیقمدان ایکنجیه کجک ممکن اولاماز. صو کرا ده هر باصاماق، فوقنده کی ایچون برنوع حادثه متقدمه، مؤثر، سبب شکانی آلیور. بو نظریه ایسه: بسیطدن مرکبه دوغری سیر طبیعیدن عبارت اولان «تکامل» نظریه سی دیمکدر. بو نظریه یه کوره ریاضیات اولماسایدی، علم هیأت اولامازدی، هیأت اولماسایدی، حکمت طبیعی اولامازدی، الی آخره. اکر بو نظریه یالکز بر نظر تاریخیدن و علومک یکدیگریله اولان ارتباط و احتیاج متقابلندن عبارت قالسایدی، هیچ برشی دنیله مزندی. لکن قونتک فکرینه کوره بو علوم یکدیگری و الددر. ده دوغریسی یکدیگری نك شکل متکاملی درلر. مثلاً علوم اجتماعیه، علوم حیاتیه نك شکل متکاملی، علوم حیاتیه ایسه علم کیمیانک شکل متکاملی، الی آخره در. شو حالده علوم آراسنده کی فرق، بر کمیت تفاوتندن عبارت اولوب کیفیت اعتباریله هیچ بر فرقلی یوقدر، زیرای واحدک درجات متفاوته سی درلر.

ایسته کوریلور که یالکز بو تصنیف علوم بحی ، باشلی باشنه بر مسلک فلسفی میدان کتیره جک مسائل مهمه بی محتوی در . اگر قونت ، ساحه علومدن اولیات مباحثی طی اتمه سهیدی ، بوتوجید علوم صوگ درجه معقول اولور وزیرا بو توجید ، فکری واحد نامتاهی به ایصال ایدردی . لیکن قونتک مسلکینده بویه بر امکان یوقدر . بو مسلک یالکز حادثاتی احتوا ایدر . قونت ، یوقاری ده دیدیکمز کی ، وحدت وجود مسلکینی ده رد ایدر حتی اوکا : مسلک کفرک بر شکل ظریفی « نامنی ویریر ! شو حالده قونتک تصنیف علوم دولایسیله میدان قویدینی نظریه توجید ، میدان حادثاتی کچمه جکی ایچون ، مادیون پرنسیپلرینه و مسلک کفره خدمت ایدمیلیر ، ناصل که فلسفه دهریه نك صوگ تکامل و فورانه « پوزیتیویزم » مسلکینک چوق دخلی اولمشدر . قونتک تصنیف علومنده شایان دقت دیکر نقطه لرده واردر . مثلاً : علم احوال الروح ، علوم اساسیه دن عد ایدیله مش و علوم حیاتیه نك بر شعبه سی اولان « فیزیولوژی - منافع الاعضاء » علمنک بر بحث مخصوصی درجه سینه ایندیریلشدر . شو حالده علوم اخلاقیه ، تاریخیه ، ادبیه ، هیپ تاریخ طبیعی نك ، علم حیواناتک بر شعبه سی منزله دوشنیور . شو افکارک ایسه مسلک مادیون و کفره نه درجه خدمت ایده جکی میدانده در . قونتک شو افکاری میدان کترین قسم حیانه تلیدلری « دوره ظاهری Période objective » نامنی ویریلور .

بوندن صوگرا اوغوست قونت ، بالاده کی افکارینک طابان طابانه ضدی اولان ایکنجی بر حیات یاشامغه باشلایور . واکش تلیدلرینک نتایجی قبول اتمدیکي بو دوره یه « دوره باطن P. Subjective » آدی

ویریلیور. اوغوست قونت ، بوتوندهای شععه دارینی میدان انسانیتدن
دین واعتقادی ، فکر الهی بی طرد و اخراج ایتمه وقف ایتمش
والله ، سبب اول ونهائی ، مطلق و نامتناهی ، اکمل وذات کی
افکار ومعنویاته فکر مثبت و فن و مدنیتک قابل توفیق و تألیف اولمادیغی
ادعا ایله مش ایدی .

لکن قونت ، بردن بزه بومسرو داتی چوروته جک افکار درمیانده
باشلادی . اولجه کفره قریب و صرف مادی و طبیعی بر ساحت فکریه ده
قلمش و هر کسی براقق ایسته مشکن ، بودفعه ده بوساحتک ضد متقابل
اولان « اسرار یون Mysticism » فکر لرینی خاطره کتیره جک مطالعاتی
اورطیه قویدی . اولجه فکر دینی بی ، دوره تفکرک ایلك صفحه سی
کی قبول و فنون مثبت و دوره سی اولان عصر حاضر دن اونو طرد ایتمشکن
شیمدی ده « بردینک لزومنه قائل !! » اولویوردی . هم ده ایشک
غریبی شوراسی که ، ینه کندی کندینی تکذیب اولوق اوزره ، دینک
بوعصره اک اوزاق اولان شکلی ، بسیط برت پرستلیکی ، مختصر بر
یونان اساطیری صورتی قبول ایدیوردی !

زواللی داهی ! مسلکنده عشق ایچون هیچ بر موقع یوق ایدی .
مکرکه مسلکک ایجاب ضرور یسنه کوره شهوتک بر شکل دیکری
اولان عشق ایچون ، اسفل سافل احتراصات بر موقع اولایلین .
بویله ایکن کندیزی شدید بر عشق ایله ، هم ده شدید بر عشق افلاطونی
ایله بر قادینی سومش ایدی . نه تضاد !

أوت ! او یله بر تضاد که صانکه ذات باری ، بوداهی مغرورک
سفامت افکارینی ینه کندینه تشهیر ایتدیرمکه ارباب تفکری ایقاظ
ایدیوردی .

اوغوست قونت ، یکی بر دین ایجاد ایدیوردی . وینه غریبی
شوراسی که کندیسنی بودینک شارعی و کاهن اعظمی اعلان ایدیوردی .
اوغوست قونت ک بودینی ، عقل اوزه رینه دکل ، حسیات اوزرینه
تأسیس ایدیوردی . بوندن مقصد ایسه ، عقل اوزرینه تأسیس
ایدن فلسفه مافوق الطبیعه وادیان متکامله دن آیرلق ایدی . ینه
دیرزکه زواللی داهی ! ریاضیاتله علم حیواناتی ، احوال الروحله علم
انسانی توحید یولنی بولمشکن عقل ایله حسیات اراسنده بو درجه
آیریلیق کورمه سی چوجقجه برشی دکلمی ایدی ؟

اوغوست قونت ک « دین مثبت » دین انسانیت « نامنی ویردیکی
بودینک عقایدی حقیقه فیلسوف « راوهسون » ، اون دو قوزنجی
عصرک فلسفه سنی نام اثرنده شومعلوماتی ویریور :

اوغوست قونت ک ایجاد ایتدیکی دین ده الله وبقا واستقلال صاحبی
روح یوقدر . انسانیت ، موجود اعلادر . قونت ، انسانیت « موجود
اعظم Le Grand Etre » نامنی ویریور . بو موجود اعظم ، موجوداتک
منبعی اولان ردن پیدا اولمشدر . یرک آدی « صنم اعظم Le Gr. Fétiche »
در . یر ، مکان نامتناهی ده کائن در . مکان « وسط اعظم Le Gr. Milieu »
نامی آلیور . موجود اعظم ؛ صنم اعظم و وسط اعظم : ایشه دین
مثبتک تشلیتی . صنم اعظم ، موجود اعظمی تولید ایچون کندیسنی
کوجولتمش ، اشاعیلاشمش وفدا ایتمشدر . بنابرین اوکامعرض تشکرده
اجرای آیین ایتمه لی یز . معافیه ککالت علیایی تمثیل ایدن موجود
اعظم یعنی انسانیت در . انسانیت ایچنده ایسه حقیقه آیین اجرا سنه
شایان اولان « قادین ! » در . آیین : موتالک خاطره سیله شفقت
وفداکارلق ایده آلی فعله چیقارمش اولان قادینک خاطره سندن
عبارتدر . بقای ارواح ، بو خاطرده مند مجدر .

او غوست قونتك شو ترجمه حال پر عبرتی انظار تدقیقه بك مهم
نكتهلر قویمقدمه در . بونلرك بریسی انسانلرك فن شكندنه ضلالت
عقلیه ايله بیله ، برطاقم احتیاجات صمیمیه دن استغنایه مقتدر اولامایه
جقلمی در . بوقیل احتیاجاتك قافله سالاری ایسه فكر الهی وفكر
دینی در .

دیگری ایسه ، هیچ برانسان عاقلك هیچ بر صورتله وحتى انكار
ونفی صورتیه بیله ، الهی [معنای تامیله] انكاره مقتدر اولامایشی در .
هیچ کیمسه ، کندی بنلکنی ، کندی وارلغی انكار ایتدکجه
[که ایده من] دیگر وارلقلمی ده انكاره مقتدر اولاماز ، اولامادینی
تقدیرده ایسه بوکیچی وارلقلمه ، بو محدود بنلكره لایتحول و نامشاهی
بر اساس ، بر سبب آرامقمن قورتولاماز . اك غافلر ، اك لاقیدلر ،
اك غودلر بیله ، آفات حیاتندن بر آزده ، کنديسنه اعماق قلب
و وجداننده کی فریادکله بیلدیکی دقیقه ده ، بیوده انكاره ازعراشدینی
واجب الوجودی ، منبع فیض عشق وجودی بیلر و اوکا خشوع
و بشیانی ايله سرفرو ایلر . بعضاً ایسه اوزات اعلایه باش ایکنمه مك
دعواسنده اولان مغرورلر ، برقادینه ، برضمنه سرفرو ایتك ذلتی
کوسبتره رك ارباب اذغانه ، وجودباری بی اثبات ایدن دلایلردن بر
دلیل عبرتتما اظهار ایدر





ایکینچی کتاب - دردنجی مبحث

حقیقت انسان

بیچون انساندن باشلایورز ؟

بوتون حقایقک غایه سی ، بر حقیقت نهاییه درکه اوکا لسان و داد و ادب « واجب الوجود ، الله عظیم الشان » ، لسان تنقید و حکمت « حقیقت وجود » نامنی ویریر . او حالده نهدن مبحث حقایقه بو اساس نهائی دن کیریشمیورده انساندن باشلایورز ؟

زیرا انسان ایچون اک بدیهی والک قطعی حقیقت ، دیگر حقایقی کشف و ادراک آلت اولان « نفسی » در . حالت طبعیه سنی غائب ایتمدیکه ، هر انسانک ، وجود تأثیری حقنده ریب و کان کوستره میه جکی بر حقیقت وارسله ، اوده کندی « بنلک » ی در . نفس انسانیک ماهیت و اساسی هر نه اولورسه اولسون ، تأثیر و اظهار موجودیت اعتباریه بدهتی هیچ بر شهه کوتورمن . هر کس : عجباشو دیده تحیرمه چاریان ا کوان واری می در ؟ عجباً بو عوالم بر سلسله حقایق می ، یوقسه بر منظومه وهم و خیالی می در ؟ و حتی : عجباً بو منظومه بدیهه نمائیک بر خالق واری می در ؟ « دیه ییلیر . بونلر ، هر وجدان حقیقت جونک ، هر فکر مدقق و متفحصک ابدی اندیشه لری در . لکن هیچ کیمسه : عجباً بن واری می ؟ » « دیه صور اماز ، چونکه بویله بر سؤال بیتله

کندی بنلکنی اظهار واثبات ایدن ، کسوه ربه بورومش و صانکه شک و کان شکنده کورومش بر تصدیق ، بر اثبات در .

ایشه بو حقیقته مبنی در که نبی ذیشانمژ : من عرف نفسه فقد عرف ربه « دیه رک معرفت نفسک بوتون معارفه و حتی معرفه الله بيله مفتاح و اساس اولدینی بیان بویورمشدر . جناب علی دیورکه :

دواؤك فيك وما تشعر
وداؤك منك وما تبصر
وانت الكتاب المبين الذي
باحرفه يظهر المضمّر
وترغم انك جرم صغير
وفيك انطوى العالم الاكبر
فلا حاجة لك من خارج
وفكرك فيك وما تفكر
وتظرفي الكتب كي تستفيد
وعتك مصنفها يخبر

شیمدی ده بو حقیقتلوی دها مفصل و دها فنی بر شکله مناقشه ایدلم . بر انسان ، کندی محیط اولان اشیایی ، بو اشیانک سبب وجود و قیامی اولان علت اصلیه یی او کر نمزدن اول کندی سنک نه اولدینی او کر نمسی لازم کلیر .

واقعا دینیه بیلیرکه : حقیقت وجود و علت غاییه او کر نیلد کدن صو کرا بالطبع تفرعاتدن معدود اولان اکوان و انسان ده او کر نیلمش اولور . « ایشه نظر سطحی ایله باقیلیرسه ، بوقضیه دوغری و موافق ظن ییایلیر . لکن تاریخ فلسفه و حکمت ادیان ، بو دعوانک دوغری اولمادیغنی پک واضح بر صورتده اثبات ایتکده در . اولا انسان هر نه بیلیرسه ، بالضروره کندی ادراک و استدراکی سایه سنده بیلیر .

« مجنونہ تکلیف یوقدر، دینك شرط اساسیسی عقلدر » دستورلری محض حقیقتدر . مادم که انسان هر نه بیلیرسه کندی ادراك ومحا کما فی سایه سنده بیلیر ، شو حالده لازم کلزمی که اول امرده بو ادراکک نه دن عبارت اولدیغنی ، نره دن کلدیکنی ، نره لره قدر توسیع اطلاع ایده بیله جکنی ، نه کی قواعد تابع اولدیغنی وتعبیر آخرله « کندی » فی بیلسین !

ألنده کی میزانك قیمتی ، وظائفی ، درجه و زنی بیلیمین بر ادمك طار تدیغنی شیلره ناصل اعتماد ایدیلیر؟ و ناصل دوعری اولور ؟ انسانك ألنده ایسه کندی وجدان وادرا کنندن باشقا بر آلتی ، بر میزانی یوقدر . ایشته بو حقیقه ، بو حکمته رعایت ایتمه نك جزاسی در که تاریخ فلسفه ، یکدیگرینی نقض ایدن لایحصى افکار واقوالی احتوایدیور ، ینه بو حکمته مبنی در که بروقتلر يك پارلاق وقطعی ظن وفرض اولونان واثبات صانع ، حقیقت اکوانه دار اولان برهانلر ، بو کون قیمتسز سوز ییغنی منزله سنه دوشمشدر . نفسنی بیلیمزدن اول ، هیچ بر کیمسه نك حقایق خارجیه صاغلام بر اطلاع پیدا ایده میه جکنه کوزل بر مثال اولق اوزره ، اکامل عارفیندن بریسی شویله بر حکایه جك دها دوعریسی بر رمز لطیف نقل ایدیور :

« وقتیه پادشاهلردن بریسی آنادن دوغما بش اون کوری بر آرایه جمع ایله کندیلرینه دیمش که : شیمدی سزی برشی عجیب ، واجه سنده براقاجز ، بر آن ایچین اوشیته تماس ایده جکسکز . هر هانکی کز اوشیءك موافق حقیقت بر حالده تصویر وتعریف ایدرسه کز ، اوکا بویوک بر مکافات ویره جکم . »

« کورلرک حضورینه بر فیل کتیر ایش ، هر بریسی فیلک بر طرفنه تماس ایش . صوکر ا بر دانه سی فخر و فناعی اعلان ایدن بر طور له دیش که : فیل : دیره ک کی برشی ایش ! »

« بو کور ، فیلک با جاغنه تماس ایده فی ایش . فیلک خرطومنه یایشانی دیش که :

وای کیدی اذعان وای ! آیول فیل : دیره ک کی دکل ، یوشاق و اوزانیر قیصالیر برشی ! »

« فیلک قویروغنه آل آنان دیکر بری ایسه :

فیل : بر قویروقدن عبارت ! »

دیش . بو کورلرک اقوالنده بر رنبذه حقیقت وار ، لکن هیچ بری حقیقت شامله دکل . نیچون ؟ زیر اوانلر ، کشف حقیقت ایچین اک محیط حاسه اولان بصردن ، یعنی آلت و میزاندن محروم ایدیلر . واقعا ک اسکی زمانلرده بیله « نفسکی بیل » قضیه حکمیته سنک زبا نزد متفکرین اولدینی کوریلیر . از جمله « سقراط » ک تقرات حکمتی « سن سنی طانی ! » دستور لطیفی ایدی . لکن اودورلرده بو توصیه یالکیز بر مقصد اخلاقی بی تضمن اتمکده اولوب حقیقی اولان جهت فیه و حکمیته سی مقصود دکلدی . متصوفین اسلامیه ک اکثریت عظامی سی دخی « من عرف » نکتته سنک یالکیز جهت اخلاقیه سنی اله آله رق : نفسکی عاجز کوریر سه ک ، ربکی قادر ، نفسکی محتاج کوریر سه ک ربکی صمد ، نفسکی هالک کوریر سه ک ربکی باقی کورمش اولورسک . یولنده تقسیرانده بولورلر . بو تشریحات اخلاقیه ده لزومسنر وفائده سنر دکلسه ده نفسک معرفتی باشقا ، صلاح و فساد یینه باشقا شیلوردر

ملکات عقلیہ انسانیہ نك تحلیل وایضاحی لزومی حس ایتمش بویوك زکالتاریخ حکمتده کوریلور . شرقزده حروفیلر بواحتیاجی حس ایتشلردر . نه چاره که علوم طبیعیہ چوقدن بری متروک بر حالده بر اقلیدینی کبی علم احوال الروحده مافوق الطبیعه ایلہ قاریشیق ومبادی حالده قلمش اولدیغندن ایضاحات حروفیه صنعی و اسرار انکیز بر منظومه اقوالدن عبارت قلمش ومقصده خدمت ایدمه مشدر .

متصوفین خارجنده بر اقلان حکمای اسلامیہ نك اکثریسی «آرسطو» نك مسلکنی شرح وتفسیر و برارده تصوفله مزج ایتکله حتی مشائیون مسلکنه بر لون تصوف آمیز ویرمکله قناعت ایتشلردر .

غربک انتباهنی متعاقب ، فلسفه بر دور ترقی به کیرمش اولدیغندن بعض فیلسوفلر ، علوم طبیعیہ وتجربیهی نظر دقنه آلاق ، علم احوال الروحی یکی بر اصول دائرہ مننده تدقیق واکمال ایتک مسلکنی ترجیح ایتشلردر . انکیزلردن « داوید هوم » [*] دیورکه :

« کواکب وسیاراتک ادوار و اختلااتی قانونلری کشف ایدیشکن ادراک انسانی نك تابع اولدیغی قوانینی کشفدن مأیوس اولمالی می یز ؟ » ایشته معارف انسانیہ نك بوتون نقاط مهمه سی ، اساسلری شو جملهده مندمجدر . فلسفه وفنک الکبویوك نقصانی ، هر تتبع وتدقیقه اساس اولان بونقطه یی آزچوق اهمال ایدهرک تفرعاتله مشغول اولماسی وبالضرور عمان فرضیات وظنیاته دوشمه سی در . داوید هومک فلسفه سی ،

[*] انکیز متفکرلرینک سرفرازاندن بولونان داوید هوم ، ۱۷۱۱ سنه میلادیسنده تولد و ۱۷۷۶ ده وفات ایتشدر . مشارالیهک اک مهم اثری « Recherche concernant l'entendement humain » یعنی « ادراک انسانی حقنده تفحصات » در .

برچوق نواقصى حاوى در ، لكن مبدأ واصولى غایت كوزلدر .
 كندیسنك بوكوزل نقطه دن باشلادینى منظومه فلسفیه سی ، یاكلش
 بریول تعقیب یوزندن ، ریب چوراققلولنده قالمشدر . ادراك انسانى
 بی دها مکمل برصورنده تحلیل ایسه المانیالى « قانت » [*] نصیب
 اولمشدر . قانتك فلسفه تنقیدى بومسئله بی تماميله تنویر ایتمکده
 اولدیغندن اونك مسلك وافکارینی واضحاً بیلدیرمك ایستهرز .

[*] قانت ، که نیغسبرک شهرنده ۱۷۲۴ تاریخنده تولد ایتشدر . اشهر
 آثاری « تنقید عقل صافی » و « تنقید عقل عملی » در .





پشنجی مبحث

تنقید عقل محض [نظری]

Critique de la Raison pure

برنجی قسم : تنقید حساسیت

بی طرف و حقیقی متفکر لڑک فلسفہ عطف استدکاری اک بویوک
قیاحت یکدیگری متناقض برچوق مسلکری حاوی و هر مسلک
دیگر بر مسلکی چورتیکده بولونماسی و هپسنده کی دلائل و براهینک
یش اشاعی ، یش یوقاری ، عین قوت و عزیتده اولماسی در .

مسلک مادیون مورخی مشهور « لائتر » :

« فلسفه تاریخی دیمک ، افکار متناقضه و نظریات واهی تاریخی
« دیمک در .. » حکمنده مضطر قلمش و مسلک رب [لادری]
اربابنک حقیقی هجوملری ، هپ بونقطه نظرله وارد اولمشدر . قانت
دیورکه :

« حقایق نومغویاتدن بحث ایدن آدملر ، صانکه کولکه لرله محاربه
ایدیورلر ! بو کولکه لرلی منطق شکلی نک هوئی قیلجیلله کسوب
یچدنگری متعاقب کولکه لر « والهالا » قهرمانلری کی ینه بر آن
صوکر ا دیریلرلر ، بر حالده که فیلسوفلر بر برینه بویله هوئی ضربلر
ایندیرمک ذوقه دوام ایده بیلرلر . »

مافوق الطبیعه و نهائیات ایله اوغراشان فیلسوفلرک بو مجادلاتی

مشاهده ایدن ریئون ، دکل یالکنز معنویاتی ، حتی عقلک سلامت و قیمتی بیله انکاره قدر کیدیورلر .

دیگر طرفدن حکمیون [دنیایماتیک] مذهبه سالك اولانلر ، عقل بشره نامحدود بر قدرت و محیط ویریورلر . بری افراط ، دیکری تفریط .

قانت ، هرایکسی برر حقیقماز یول اولان افراط و تفریطه . دوشمیهرك دوغری بر طریق تتبع بولمق ایچین : نه بیلیمکه مقتدرز ؟ . سؤالی صوریور .

بوسؤال غایت موافق والزمدر . اوت ، نه بیلیمکه مقتدرز ؟ ایش بوراده در . دقت ایدیله لی که بوسؤال ایله « نه بیلیمه لی یز » « ناصیل بیلیمه لی یز » کی سؤاللر آراسنده چوق بویوک فرقلر وار . بوایکنجی نوع سؤاللر ، آنجق ایلك سؤال حل ایدلدکن صوکر ا جای بحث اولابیلیر . اولا آکلاشیلماسی لازم اولان جهت ، بیلیمک ایچون یکنه آلتمز اولان ادراکک ، قیمت و قدرتی در . بر کره بوقیمت و قدرتی ا کلاسه ق ، ادراکمزله نه آکلا یا بیله جکمز یه تعیین ایتمش اولورز .

قانتک بوسؤالی ، نفس انسانی نی تحلیل تکلیفی دیمکدر . فنک حال حاضرینه کوره بوتحلیلاتی یایالم .

بوتون معرفتلمز ایکی شیدن متشکلدر : بریسی مواد ، مایه معرفت ، دیکری اشکال معرفت .

احساسات مختلفه بزه خارجدن کلیمکده در : الوان ، لذت ، رایحه وسایره کی . بوا احساسات ، بزده ایلك ایقاع ایدلدیکی زمان غیر منتظم ، غیر صنف ، و پریشان بر حالده در . اگر احساساتمز بو حالده قالسایدی ، حیاتمز بر اوزون رؤیایه بکیزردی . بر چوق شیلر حس

ایدر دك ، لكن تفكر ایتمه مقتدر اولامازدق ، زیرا تفکرایده بیلیمك ، ایچون بو مواد پریشان معرفتی ، بولایحصی احساسات سلسله سنی تنظیم ایتمه من لازمدور .

مواد معرفتی تنظیم ایچون ، بوموادی یکدیگرینه ربط ، اولنری بر درجه توحید و بر فاعل واحده ارجاع ایله مك یعنی احساساتی ترکیب ایتمك لازمدور . ایشته بو عملیه ، مواد معرفته بر شکل ویرمك دیمکدر . مثلاً : اوجاق ، آتش ، حرارت ماده لرینی ترکیب ایله بروح دت میدانه کتیر برز . بویله بر ترکیب ، بویله بروح دت احساسات مزده موجود دکلکن اولنره بووحدتی مفکره من علاوه اییدیور .

احساسات هب مطاوع و غیر فعالدر . مفکره ایسه فعالدر . مفکره دك فعالیتی ، حادثاتی یکدیگرینه ربط ایله اولنردن بر ترکیب ابداع ایتمك یعنی « توحید » ایله مکدر .

قانه کوره موضوعات معرفتی توحید ایدن خواص انسانیه اوچدر : حساسیت ، محاکمه ، عقل .

حساسیت ده ایکی نوعدر . بریسی حساسیت خارجه درکه اشیایی . [یعنی موضوعات حساسیتی] مکان ایچنده توحید ایدر . اشیای خارجه دت بر شیده کسب اطلاع دیمك ، اوشیك حصوله کتیردیکی احساساتی مکان ایچنده یکدیگر یله تردیف ایتمك دیمکدر . مثلاً کونشه اطلاع دیمك ، قوه خیاله ایله کونشك شکلی ، باطناً ، بر لوحه اوزدرینه رسم ایدرکی ، ترسیم ایتمك دیمك اولور .

احساسات مزی بو صورتله تنظیم ایتدکجه واضح اطلاع وضبط صاحبی اولامایز . بوسبیه مبنی اطلاع خارجی ایچون مکان « برنوع قادرو » لوحه ، شریطه » در .

حساسیتك ایکنجی نوعی « حساسیت باطنه » در که بوکا « وجدان تجربی » نامی ده ویریلیر . اونکله « حظواضطراب » کبی حسیات بیاطنیه مزی ، افکار مزی ، مقررآتمزی برخط وحیدالشکل اوزره رنده ترتیب یعنی اونلره بر انتظام وتوحید اعطا ایده رز . حساسیت باطنه مزك شریطه سی ایسه « زمان » در .

شو حالده « مکان » و « زمان » حساسیت انسانیه نك شریطه سی در . اکر بو ایکی شریطه موجود اولماسایدی ، احساسات مزی منتظم سلسله لر حالده تنظیم ایده مز ، واطلاع خارجی وباطنی یه مقتدر اولامازدق . بر رسام ایچون ، اوزرهینه رسم یابدینی والوانی وضع ایتدیکی قنویجه نه ایسه ، انسان ایچونده مکان وزمان اودر . یعنی احساساتی مکان وزمان ایچنده توحید وترکیبه مقتدر اولور . بوراده پک مهم برسئوال وارد اولور : عجبا مکان وزمان ، اشیانك شریطه موجودیتی می در ؟ اصلا !

بویله بر حکم وظنه دوشمك ایچون هیچ بر سبب معقول ومشروع موجود دکلدر . مکان وزمانك بر موجودیت خارجیه سی اولدینی ادعاییه دوغری دکلدر . بونلر بر « فکر مجرد » ودها طوغریسی حساسیت مزك « اشکالی » در . بنابرین هیچ بروقت اونوتامالی یز که مکان وزمان فکرلری بزه خارجدن کلیور ، بالعکس اشیای خارجیه مکان وزمان شکللرینی بزم مفکره مز طبع وتطبیق ایدیور . بوسبیه مبنی « مکان وزمان » فکرلری « تجربی دکل » ، « بدیهی و آتی » در . بونلر ، مدرسه تجربه اربابنك ادعا ایتدیکی کبی تجربه محصولی دکلدر ، بالعکس اصلی و بدیهی وتجربه نك ده شریطه امکانی در . بویله اولدینی ایچوندر که مفکره مزدن زمان ومکان قیدلرینی بر درلواحما وازاله ایده مه یز . بو ایکی نوع تمثیل ، بزم فکر مز اعتباریله « ضروری » درلر .

فانت بوراده اخطار ایدیور که بو « ضرورت » صرف بزم ذهنیت مزه کوره موجود اولوب یوقسه مکان وزمان بذاته ضروری دکلدردر . حتی بو تمثیلاتدن بردورلو تجرد ایده مه یشمزده اثبات ایدر که اونلر ، طبیعتمز و تشکلات ادراکیه مزک ایجابی درلر . وبوسبیله قیمتلوی آنجق بزم فکر مز اعتباریله اولوب یوقسه فکر بشر خارجنده قیمت موجودیتلری ادعا و اثبات اولوناماز . بر حالده که طبیعتمز بو صورتله مخلوق اولماسایدی ، یعنی اشیای خارجییه اطلاع ایچون بزه کوره مکان وزمان بزر شریطه حساسیت بولماسایدی ، اشیای باشقا صورتله کوریر و بیلیردک .

شومطالعاندن مستبان اولاجغنه کور « زمان و مکان » بر « شکل ذهنی ، فکری ، خیالی » اولوب بلکده هیچ بر حقیقت خارجییه سی یوقدر . [*]

فانت ک شوده زین مسروداتنه کوره « عالم ظاهری » یعنی احساسات مزله موجودیتنه ایصال اطلاع ایلدیکمز « مکونات » بر « کورونیش ،

[*] زمان و مکان فکرلرینک حقیقی حقننده متفکرین ، متفق دکلدردر . حتی بواکی فکرک صورت حصولی حقننده بیله اتحاد تام موجود دکلدردر . زمانمزک اکثری متفکرلری زمان فکرینک « مدت ودوام » فکر تجربیسندن و مکان فکرینکده « امتداد » فکر تجربیسندن بالتعمیم والتجربیدمشتق اولدیغنه قائلدرلر . فانت و دیگر بعض فیلسوفلره کوره ایسه زمان و مکان فکرلری ، تجربه نکرده شریطه امکانی و بنا برین تجربه یه ده متقدم اولدیغندن ادراک بشرک تشکیلات طبیعیه سندن معدود و افکار اصلیه و ضروریه دندر . ایلروده کوریله جکی اوزره نیوتون و قلازق کبی بعض متفکرلر ، زمان و مکانی نعوت الهیه دن عد ایدیورلر .

وجودیون مسملکی سرفرازاندن اسپینوزا دخی امتدادی ، فکر ایله برابر ایکی نعت اصلی الهی کورمکده در .

ظهور ، نمایش « دن عبارت در . شریطه اطلاعمر اولان زمان و مکان ایسه » بعض حقایق خفیه نك رمزندن عبارت » در . بوحقایق حساسیتمزله وقوعه کلن اطلاعمره و تمثیلاتمزله کوره محاکمه ایتك اصلا دوغری دکلدر . برشیك کورونیشندن اوشیك حقیقته حکم ایتك قدر معناسز برشی اولاماز . بویله حکملر ، ایچندن چیقلماز افکار متناقضه میدانه کتیریر .

حساسیت بشریه حتمده قانتك تنقیداتی شو صورتله زبده ایتك . فانتزه کوره اشیای خارجییه ، شریطه حساسیتمز اولان زمان و مکان قیدیه حس وفهم ایدیورز . شو حالده کوردیکمز و بیلدیکمز حقایق اشیا اولمایوب حساسیتمزك طبیعت و تشکلاتی ایجابی اولان بر « تظاهر ، نمایش » دن عبارتدر . شیمدی ده خاصه محاکمه نك تنقیدینه برکوز آتالم .

ایکنجی قسم : تنقید محاکمه

قانون مثبتته نك موضوعاتی یالکمز حادثاتدن عبارت دکلدر . قوانین دخی بوموضوعات میاننده در . حساسیتمزله برشیئي ضبط و حس ایتدیکمز وقت ، وظیفه فن ایفا ایدلمش و بر معرفت قیه الده ایدیلش صایاماز . مثلاً . زمان و مکان رمزی آئنده آتش حادثه سی بزده تمثیل ایدیلدیکی وقت ، یالکمز بر عملیه حساسیت جریان ایتش اولور . بونی بر عملیه ادراکیه یعنی محاکمه ایله اکمال ایتمه من لازمدر . ادراک ، حادثاتی یکدیگرینه ربط ایچون آرالرنده کی ثابت مناسباتی ، علاقه یی تأسیس ایدر که بو ثابت علاقه لره « قانون » نامی ویریلیر . ایشته بو عملیه ، بر محاکمه در . مثلاً : آتشك تماسیله یانمق کیفیتی بر محاکمه ایله ، غیر متحول بر صورتده یکدیگرینه ربط ایدر .

بو محاکمه لری اجرا ایچون اوچ قانون کلی دن استعانه ایدرر :

۱ — علت کافیه دستوری ،

۲ — آهنگ متقابل دستوری ،

۳ — دیمومت قوت دستوری .

علت کافیه دستوری شو صورتله افاده اولنور : هر حادثه نك علت

کافیه سی [یعنی شریطه وقوعی] دیگر بر حادثه متقدمه مند مجدر . «

آهنگ دستوری شو صورتله در میان ایدیلیر : بوتون حادثات آراسنده بر آهنگ متقابل موجوددر . «

دیمومت قوت ایسه شو صورتله اتیان اولونور : بوتون حادثات

آلنده عین کمیتده قوت ثابت و دائم قالیر . «

ایشته سایه ادر اکرزده بواوچ قانونی متفرق آحاد و حادثات دن متشکل

اولان عالم محسوسه تطبیق ایله اولیه بر « کل - مجموع » میدان کتیریورز که

بوتون اجزاسی یکدیگریله مرتبط بولونیور . اشیانک هربری برر

حلقه یه و مجموعی نامتناهی بر سلسله یه بکزه مکده اولوب بو حلقه لر

بر برینه « ضروری » بر صورتده مربوط و غیر قابل انفکاک بولونیور .

منظومه اشیانک یکدیگری نی تعیین و تقدیرندن عبارت اولان بو

« جبریّه کلیه و عمومیه » قانونی ، فنک و معرفت قیه نك شریطه امکانی در .

قائده کوره ، ادر اکرزده موجود اولان بو قانون ضرورته ، بو دستور

جبرییه توفیق ایدم دیکمز موادی ، فنا معرفت غیر قابلدر .

قوه عامله نك دوامی ، اثرک سببی تعقیبی ، و اجزای کائنات آراسنده

آهنگ : ایشته بواوچ شکلی تعقیب ایتمدکجه اشیا حقنده بر فکر پیدا

ایتمه مز ممکن دکلدر .

لکن هر بیلدیکمز شیئه تطبیق ایتدیکمز بو قانونلر ، عجبا فی الحقیقه

منظومه موجودیتک قوانین حقیقیه سی می در ؟

قانت ، بویله بردعواده بولنغه هیچ بر صلاحیت کور میور . اولاً
اشیایه حاکم کوردیکمز جبر قانونی ، بوتون اشیایه ، نامتناهی محسوساته
شاملدر ، دنیله من ، زیر ازم دائرة اطلاقمز خارجنده قلمش موجودات
اولامایاجنی نه دعوا ونده اثبات ایده بیلیرز . مع مافیه دائرة تجربه مزه
کیره بیلن بالمله حادثاتک بوجبر قانوننه تابع اولدیغنی کور میورز .
عجبا بوقانونک ماهیتی نه در ؟ بر حقیقت خارجیه سی وارمی در ؟ قانت
بوسؤاله جواباً دییورکه : بوقانونلر ، ادراک بشرک شریضه سی در .
ناصل که شریطه حساسیتمز زمان و مکاندر ، اویله جهده شریضه ادراکمز
تعاقب ، دوام و تقابل یعنی قانون جبردر . حساسیتک ایچون زمان
و مکانه ، فهم ایتک ایچون ایشه بوقانونلره محتاجز . بوقانونلر ، طبیعت
وهویتمز مقتضاسی در . »

ایشته کوریلورکه جبریه قانونی صورتیله متظاهری اولان قانون
ضرورتک دخی قانت کوره برکونا حقیقت خارجیه سی اولمایوب بوقانون
صرف « ذهنی » یعنی یالکمز وجدان بشرده موجوددر .



اوچونجی قسم : تنقید عقل

حساسیت و محاکمه عملیه لریله معلومات بشریه حدنهاییه ، وحدت
ظاهیه ایصال ایدلمش اولماز . حادثاتک یکدیگریله اولان ارتباط
ضروریسی اثبات ایتکه ایش بتمش صایلمماز . بو ارتباط ضرورتک
سببی نه در ؟ بو حادثات نهن بویولده وقوعه کلیور ؟ قوت نه در ؟ سبب
نه در ؟ والحاصل مفکره بشر ، حادثاتدن حادثاته ، اسبابدن اسبابه ،
قوانیندن قوانینه انتقال ایده رک سیرنهایسند بوتون بو حادثات و تحولاتی
ربط ایده جک ، بونلرک علت اصلیه سی اولاجق ، تحولدن ، احتیاجدن ،

اسبابدن منزّه و مستغنی بر « غیر مشروط ، بذاته موجود » بولق اضطرارنده در . بویله یا پمادجه هیچ بر شیئی بیلمش صایلماز . بوتون بوکثر ثلری بروحدت حقیقه و غایه یه ایصال ، معرفت و فن ایچون الزم و ضروری در . واقعا بو تحری ، بلذات فنک موضوعی دکدر ، زیرا فن یالکنز محسوسات و حادثات ایله اونلرک آراسنده کی روابط و علاقہ یی تحری ایله اکتفا ایدر ، لیکن یالکنز اودر جده بر اقیلمش و صورت قطعیده توحید ایدیله مش اولان معارفله وجدان بشر قناعت ایدمز . مطلقا حادثاتی ارجاع ایدمک یرسبب نهائی ازار . ایشته بو مباحث عالیله اشتغال ایدن خاصه متماز ادر اکیه منزّه « عقل » نامی ویریلیر .

عقل : روح ، حقیقت عالم ، و واجب الوجودی تحری ایدن خاصه در .





آلتنجی مبحث

بوتقیدادن چیقان نتیجه

و

تنقیدی تنقید

حقیقت روح ، حقیقت عالم ، و حقیقت وجود یعنی واجب الوجود ، مطلق فکرینک اوچ شکلی در . قانت مطلق وجودی انکار ایتور ، لکن بر طرفندن ده ادراک بشرک اونی بیلمکدن صورت قطیعه ده عاجز اولدیغنی ادعا ایلور .

مطلق فکرینه دائر سرد ایتدی کمز مطالعات ، هب اشکال ادراکیه مزدن عبارت اولوب بزجه بواشکال خارجه چیقماق و حقایقه مطلع اولماق ممکن دکلدن .

قانت ، بوتون محاکمانی بونقطه نظرله یوروتورک نهایت کندیسینک ده ارزو ایتدیکی فنا بر نتیجه واصل اولویور : ریب !

قانتک تماماً موافق فن و حقیقت بر صورتله باشلادیغنی تنقیدک یومفرط نتیجه و وصولی شایان تأسفدر . و هر حالده بویله بر نتیجه نیک تمامندن توقی چاره لرینی تحری شرطدر . بزبوتحریری قانتک تنقیدینی تنقید شکننده یاپاجغز . لکن اول امرده قانتک « آتینومی - احکام متضاده

Antinomie » نامنی ویردیکی مسئله لری تدقیق ایدلم .

قانته کوره دورت نوع احکام متضاده وار :

برنجیسی — عالم ، زمان و مکان ایچنده محدودمی در ؟ سؤالنه
شیمدی یه قدر ویریلن ایکی نوع جواب ، برنجی آنتینومی یی تشکیل
ایدر . بوجوابلرک بریسی عالمک محدودیتنه ، دیکری غیرمحدود اولدیغنه
داردر .

قانتك ادعاسنه کوره عقلاً هرایکی جواب عین قوت و معقولیتده در .
ایکی جوابدن برینی دیکرینه ترجیح ایتک ایچون اسباب قطعیه مفقوددر .
مسئله ، داره تجربه یه کیرمدیکی ایچون هرایکی طرفک ادله سی ، غیر
قابل میزان و تمیزدر .

ایکینجیسی — عالم ، اجزاء بسیطه یه می قابل تقسیمدر ؟ یوقسه
المنزایه قابل تقسیم می در ؟

قانت کوره هرایکی دعوا عین قوتله قابل مدافعه در . بنابرین
کرك برنجی و كرك ایکنجی آنتینومی نك حلی ، آنجق اونلره ویریلن
جوابلری عدم قبول ایله ممکندر ! بوکاسب اولمق اوزره قانت دییورکه :
«بومسئله لری یکدیکرینه ضد بر صورتله حل ایدن مخالفلرک حمله سی زمان
و مکانه بر حقیقت خارجیه عطف ای دییورلر ، بوتون دلیللاری زمان و مکانک
خارجی و حقیقی برر موجودیت اولماسی اوزهرینه موضوع . حالبوکه
زمان و مکان ، آنجق برر موجودیت عقلیه دن عبارت اولوب ذهن
یشر خارجنده موجودیتلری یوقدر . »

«آنجق ذهن بشرده موجود وادراکمزک اشکالندن معدود اولان
زمان و مکان فکرلری اوزهرینه قوریلان دلیللرک هیچ بر حقیقت
خارجیه ، ضرورت حقیقیه بیان ایده میه جکندن ، ایسترتصدیق اولسون ،
ایسترتنکار اولسون عین مرتبه ده معنا سزدر . »

یوایکی آنتینومی ، افکار ریاضیه اوزهرینه مؤسسدر .

اوجونجیسی — حریت معنویه واردر ، جبر و ضرورت طبعیه واردر . یعنی عالم ده ، مادیاتده ، ساحه طبعته حریت یوقدر .
دوردنجیسی — بر موجود واجب واردر ، آتجق موجودات حادثه واردر .

قانت بوصوك ایکی آنتینومی ده کی متضاد حکملوک تألیفی امکانه اعتقاد ایدیور ، لکن احکام عقلیه ونظریات فلسفیه ایله دکل ، احکام اخلاقیه وانسانده کی فعالیت حره بی نظره آلاق .

قانتك بوصورتله تألیف اضداد ایتهمسی پك چوق صو کورتوریر . ادراك انسانیك قانادلرینی کسدکن و افکار اولیه ایله یو ادراك آراسنده هیچ بر امکان ارتباط وعلاقه بر اقادقن صو کرا آتجق ادراك ایله ممکن ومتصور اولان اخلاقیاته استناداً اثبات اولیاته واثبات واجب الوجوده کیریشمک ، فی الواقع پك زیاده اعتراضه یول آچار . بنابرین قانتك تألیف اضداد ایچون بولدیغی یول ، حسن نیتنه ، حسن دینسنه دلیل اولسه بیله پك ده حکیمانه ومتفکرانه عداپله مز .

قانتی بو افراطه سوق ایدن ومسلیکنی بالضروره رب مفرطه کورتورن جهتلزی برقاتدها ایضاح ایتمک اوزره روح انسان حقنده کی افکارینی انظار قارئنه قویالم . قانت دیورکه :

« اسکی علم تکوین « Ontologie » اول امرده انسانده بسیط وعینیت صاحبی بر « جوهر ، ذاتیت ، ماهیت » یعنی روح اولوب اولمادیغنی تحری ایدردی . بوجوهر ، ادراکدن عبارت طوتونازدی ، بالعکس ادراك ایدیجی وادراکک مسندی صایلیردی . »

« پك واضحدرکه بویه بر جوهری دوغریدن دوغری یه یاپه بیله جکمز بر تجربه ایله بیله میورز ، یعنی اوکا ادراکمزله در حال مطلع اولامیورز ،

زیرا بونک عکسی یعنی اوکا ادرا کمزله در حال اطلاع پیدا ایتسه یدک ، روح ، ادراکک عینی اولماسی لازم کلیردی . حالبوکه روح و ادراک شی واحد اولمایوب ادراک ، روحک بر خاصیتی در . علمای تکوین ، ادراکک ممکن اولماسی ایچون بر مسنده ، بر قاعل مستقله محتاج اولدینی قبول ایدیورلردی .

« شو حالده ایسه ادرا کدن آیری بر جوهرک ، بر روحک موجودیتی اثبات ایچون استدلاله مراجعت و حاد نادن بو حاد ناک آلتنده مختفی اولان ماهیته حکم ایتک ایجاب ایدر . بوبله بر حکم ایسه غیر ممکن در . » قانت ، بو عدم امکانی اثبات ایچون ده دیورکه :

« ادراک ، کندی کندینی درک ایتدیکی وقت « واحد و صاحب عینیت » شکلنده تفکر ایدیور . ادراکک بو وحدت و عینیتدن ، ادراکدن باشقا برشی و ادراکک مسندی اولان روحک وحدت و عینیتنه نه صلاحیتله حکم ایدیورز ؟ روح و ادراک شی واحد دکلدر . دیمک که ادراکده کی وحدتی روحه عطف ایتمکه عین دن عین کچمیورز . برشیدن دیگر بر شیئه کچیورز . بو ایسه مغالطه در . برشی ده وحدت واردیه اونک خارجنده دیگر بر شیئه ده وحدت اسناد ایتک دوغری اولاماز . روح ، حقیقه موجود اولایلیر . لکن روحک ، ادرا کمزله فهم ایتدی کمز صورتده موجود اولدینی ادعا و اثبات ایده مه یز ، زیرا بزه ظاهر و بزه معلوم اولان شکلندن اونک حقیقه تنده او شکلی ویرمک صحیح دکلدر . »

عین مشکلات ، هیئت مجموعه سی نظر اعتباره آنان کائناتک طبیعت مطلقه سی حقنده دخی رونما اولور . بو مسئله ده بر برینه ضد بر طاقم احکام متناقضه یه یول آچار . عجبا بو متضاد حکملر ناصل حاصل اولویور ؟

قانتہ کورہ بونلرہ سب ، عقل انسانی نك برتوهمی در . عقل انسانی ، کنندہ موجود اولان « ضرورت » ی اشیادہ بولونمائی لازم کلن ضرورتلہ قاریشدیر بیور ، تعبیر آخرلہ عقل ، کنندہ کی ضرورتی اشیایہ عطف ایدیور . عقلک برتوهمی اودرجه قوتلی درکہ اشیایہ عطف ایتدیکی ضرورتک فی الحقیقه اشیادہ اولمایوب کنندہ بولندیغنی فرق وفہم ایتدیکی زمان بیلہ ینہ اوتوهمک حکمنہ تبعیتدن کندینی آلامیور .

قانتک شوتنقیداتندن چیقان نتیجہ ، ساحۂ عقلی یالکیز حادثات و تجربہ یہ حصردن ، عقل ایلہ مطلق و نامتناهی آراسندہ حقیقی بر ارتباط و علاقہ یی ممکنسز کورمکدن ، والحاصل حکمت ما فوق الطبیعه یی « عقلاً » غیر قابل بولمقدن عبارت قالیور . مطلق ، اکمل ، نامتناهی و امثالی فکرلر ، مقولات عقلیہ دن عبارت اولوب ہیچ بر حقیقت خارجہ لری یوقدر . [*]

قانتک برتوہماتنی بوتون نتایجیلہ قبول ایتک ، مسلماتک ری قبول ایلہ مساوی در . انسانک علم اخلاق ایچونده ادرا کدن باشقاآلتی یوقدر . اگر بوآلت اولیاتہ ایصال اطلاع ایدہ میہ جک بر طبیعتدہ ایسہ ، نہ بر فلسفۂ ما فوق الطبیعه ، نہ بر علم اخلاق و حتی نہ برفن مشروعاً ممکن دکدر .

واقعا قانت بونتیجہ یہ ، دہا دوغریسی بوکریوہ یہ دوشمہ مک ایچون عقلدن نزع ایتدیکی امکان و اقتداری اخلاقہ عطف ایتک و بو طریق ایلہ حریت شخصہ یی تأسیس و واجب الوجودی اثبات ایلہ مک ایستہ یورسہ دہ بویلہ برامل مستحیلدر . قانتک صوک درجه مهارتلہ

تأسیس نه چالیشدیغی ادله و براهین ، ینه کندی تنقیدی موجبینجه ییقیلوب قالور .

بنابرین اونک اصول تنقیدیه نتایجی بلاقید و شرط قبول ایدرسهک ، صوک ایکی حکم متضادک حاوی اولدیغی افکار متضادهنک قابل تألیف بولندیغی حقنده کی دعواسنی ردایتمک مجبوریتنده یز . تعیر آخرله وجود الهی بی وسائر اولیاتی ظن درجه سنه ایندیرمک ضرورتنده قالیرز . لکن بومشئوم نتیجه یه دوشمک اضطرارنده می یز ؟ قانتک اصول تنقیدنده قابل اعتراض جهتلر یوقمی ؟ اگر اولماسایدی ، فی الواقع معرفت الله و اخلاقدن مایوس اولق لازم کلیردی .

لکن قانتک حادثات ساحه سنده پک دوغری اولان اصول تنقیدی ، تجربه خارجنده قالان معقولات و مدرکات حقنده هیچده دوغری دکلدر . حتی قانتک اصول تنقیدی جف القلم دوغری عدایدلسه ، کنديسنک هیچ بر دعواسنه حق ویرمک و جمله سنی و حتی حس و تجربه بی بیله انکار ایتمک ایجاب ایدر . هر هانکی حقیقت اولورسه اولسون ، ظن و وهم مرتبه سنه اینر . هایدی بو نتیجه یأس آوری ، بوریب و کان مطلق قبول ایدم . لکن بوقبول ایچون آلتمز ندر ؟ عقلک ماورای حادثاته ایصال اطلاع ایدمه یه جکنه هانکی آتله حکم ایده جکز ؟ اولسه اولسه ادراک و محاکماتمله ، عقل واسه تدلالاتمله . پکی اما اگر بو ادراک هیچ بر حقیقته ایصال اطلاع ایده میورسه ، حقایق انکار نه صلاحیتله مقتدر اولویور ؟ بر شیئی قبول ، بر محاکمه نتیجه سی اولدیغی کبی ، رددخی بر محاکمه نتیجه سی در . هر ایکی عملیه ایچون ، ثابت و دائم بر اساسه ، بر حقیقته استنادایتمک ، قبول و انکاری مشروع قیلاجق بر معیاره مالک اولق ایجاب ایدر . بویله بر اساسی آنحق عقل و ادراکمزده

بولابيليرز . لكن عقلك بومزيت واقتدارني ، ينه عقل ايله رد وانكار ايدرسهك ، محاكمازمك برقيمت واهميتي قالايليرمي ؟ اصلا .

بويله برمسللك ايله برشيئي تصديق ممكن اولامايه جنبي كي انكار دخي ممكن اولاماز . زيرا تصديق وانكار ماهية عين قوت ومزيتده عمليات فكري به دندر .

ايشته كوريليوركه قانتك منظومه فكريه سييله تصديق كي انكار دخي ممكنسز اولديغندن علوم ووفون ، بر مجموعه اوهام وظنياتدن عبارت قالمق ايجاب ايدر . ريب مفرط ، طبيعت بشريه نك بوتون قوتيله رد ايتديكي وعمليا تماماغير ممكن برمسلكدرد .


هويت انسانيده بر طقم نموت اصليه واركه بو عناصر اساسيه ني نه تماميله تحليل ونه ده انكار ممكن ومتصور دكلدر . احساسات ، حسيات اصليه ، افكار اساسيه ، اعتقاد بوجهله دندر . تفرعاتي ، بواساسلر سايه سنده تحليل وتديق ايدء بيليرز ، اونلرك سايه سنده تفرعاتي تصديق ويا رد ايديورز . بو اساسلري اولديني كي ، بسائط وعناصر شككنده قبول اضطرارنديز ، بونلرك ، هربري ، بزاقارده ايتسهك ، انكارده ايتسهك ، برر « واقع Fait » قيلندندر . ادراك انساني بر پركاره بكزر . بر آياغي بر نقطه استاده صاپلانمش قالديني حالده ديكر آياغيله دورلو دائره لر چيزمك ممكن در . لكن . كارك براوجه بويله بر نقطه استناد ويرمزمسهك ، هيچ برشي چيزمك ممكن اولاماز . ايشته ادرا كمزده بويله در . معرفت ايجون ، پركارادرا كمزي بر اساسه ربطه مجبورز ، وهم ده بوسر بوطتي بر « فعل واقع » حالنده مشاهده ايديورز . بواساس « ناستاهي » در . بوفكر ك اشكال عينييه سي اولان « سبب اصلي ، « وحدت » و « عينيت » آينه ادرا كمزده رونما اولويور . بوفكر لرك

بزه‌اشیادان کمدیکی، اونلرک اشیا ده مقفودیتله تحمق ایدیور. حتی عالمده کی حادثاته بوافکاری عطف وعلاوه ایدن بزم. عجبا بوقکرلر، بزمه دن کلیور؟ بالضرره بزم دن دکل مکرکه بزم متاهی ایله ارتباط و مناسبتمز قبول وتصدیق ایدیه.

قانتك اصول تنقیدی، قدرت عقلی حقیقتدن زیاده ظن وبوظنی سوء استعمال ایدنلره حقیقتی اخطار ایچون الزمدر. احساساتمرك [*] صورت حصولی تدقیق اولونورسه، بزه معلوم اولان حقیقتك بر حقیقت نسبه اولدینی ادعا اولونایله چکی کی اشیا ده کی یکانه حقیقتك ده «وجدان بشرک اونلره طبع ایتدیکي اشکال ادراکیه دن عبارت بولوندینی» ادعا اولونایلیر. حتی بزم ایچون بلکه ده الکطیبی واک فی ادعاده بودر.

هرهانیکی صورت قبول ایدیلیرسه ایدیلیرین، ولوکه بزه منکشف اولان حقایق نسبی اولسون، ینه بونی برامروافع کی قبول ضرورتنده بزم. هر نه وقت بونك خارجه چقارسهق، ایشته اووقت صوکی کلز و همیاته صاعمش وچوراق بر وادی ریب وخیالده قلمش اولورز. قانتك ادله واجب الوجوده عائد مسروداتی مبحث عائدنده تنقید ایده جکزر.

[*] احساسات بحثی علم احوال الروح نام اثر مرزده تدقیق ایدیلرلی در.





یدنجی : بحث

انسانده کی وحدت و عینیت

[روح]

انسان ، مختلف وظائف ایفاسیله مشغول برچوق اعضا یعنی مادی بر بدن ایله بوبندنده موجودیتنی کوسته رن بر روحدن متشکدر .

جسد ، بدن ؛ مرکب ، معین و مشکدر . روح ایسه ماهیتی مجهول و بالکز آثاری مشهوددر . بو آثار : ادراک ، حساسیت و اراده صورتلریله متظاهردر .

انسانک برجسدله [معنای عمومیسنده] برروحدن مرکب اولدیفنی انکار ایدن کیمسه یوقدر . بوتون اختلافات و مشکلات روحک شو معنای عمومیسنده موجودیتنده دکل ، بدنن مستقل و ماهیه غیر برشی اولوب اولمادیغنده و بدنک استحاله و انقسامی حائده باقی قلوب قالمایه جغندهدر .

قانتک اصول تنقیدی موجبنه ماهیات و ذاتیات ؛ ادراکک معلومی اولاماز . بنابرین حقیقت روح قابل معرفت دکدر . قانت بونقطهده ، ریه یول بر اقایه حق قیوداخترایه ایلحق وریله بیلیر . شو قدرکه برشینک حقیقتی تمامیله بیلمه مکه اوشیئی هیچ بیلمه مک ویاخود اوشیئی بیلنمز دیه ادعا ایتک آراسنده بویوک برفرق اولدیفنی اونو تمامق لازمدر .

ایکنجی جزوی

بش فورمادن عبارت اولارو اون کونه قدرانتشار ایدم جکدر .
اثرک مجموعی یکرمی ویا اوتوز فورما اولاییله جکدر . هراون کونده
بش فورمالق برجزو نشر اولونا جقدر .



حکمت مطبعة اسلامیة سی

نفاست خصوصنده هیچ بر مطبعة دن کری قلماز ، لکن قناعت
خصوصنده رقیبی یوقدر . طبع نفیس ورنکلی ایشلر ایچون زنکین
ادواته مالکدر .